

## Markus awi Lefo

### O Yohanes Wooosi wosingangasu o salamati ma habari

**1:1** Manena gena o habari 'daloloha o Yesus Kristus o Gikimoi awi Ngopa ma Duhutu. **2** O habari 'daloloha ma ngale o Yesus Kristus gena o Yohanes wahino wo'domano de wosingangasu la o bi nyawa wasidailako so o Yesus asa wahino wadoto. Maro o Yesaya awi buku ma rabaka isilefo gena komanena: "O Gikimoi wotemo awi ngopaka, 'Una to ngohi ai sosulo ngohi towisulo una asa wo'domano, una magena wosidailako to ngona ani ngeko.'" **3** So kanaga o bi nyawa o tona iboboleuka wositoore, 'Nisidiahi o Jou awi ngeko; o ngeko nisibolowo de nisitiai la una kagena asa wanonu!'" **4-6** So kagena de o nyawa moi awi ronga o Yohanes wahino de awi goge o tona iboboleuka so awi baju lo ka o haiwani ma kahi de awi doino o kahi wosipilikuka. De awi ino lo ka o galasosoko de awi ake lo ka o madu. So kagena wahino de wosingangasu de womatoore wotemo, "He! O nyawa nia manara 'datotorou de nia dosa 'dangodu bilasu nimatoba de nimatoduba de niosikasi, la nia dosa o Gikimoi wosiapongu." So o Yudea ma dokuno de lo o Yerusalemno ma nyawa yadala yahino o Yohanes Wooosika. So ona yangodu manga dosa imatoduba o Gikimoi awi simaka de gila-gila o Yohanes waosi o Yordan ma seleraku. **7** De o Yohanes o habari moili wasingangasu onaka, "Ma duuru done moi asa wahihino gena awi manara foloi ilamo, so ngohi manena to una awi simaka gena o kia lo waali idahe; ka awi tarupa ma gumi tasose lo idadiwa. **8** Dede o ake ngohi manena tinisiosika duma una magena asa wahino la nia siningaku wosingosa de o Gurumi 'Datetebi la nipareta."

### O Yohanes o Yesus wiosi

**9** Ma orasi magena o Yesus wahino o Nasaretno o Galilea ma tonaka. De o Yohanes o Yesus wiosi o Yordan ma seleraka. **10** So ma orasi una o akeye wodola de imatodoka wakelelo o dipa ileta de o Gikimoi awi Gurumi iuti imatero maro o namo dara yahino awi 'dokuka. **11** So kagena

de o ili moi o sorogaku itemo, "Ngonā manena to ngohi ai ngopa tonidododara. De ngona ngohi tonidupa." **12** Komāgena 'dabolo de o Gurumi wituda so wingaho o tona iboboleuka. **13** Kāgena o tona iboboleuka una wogoge ma deka o wange moruha de o Toka ma Kolano yahino widahake iwibaja la ma ngale o dosaku wisitura. De o haiwani ifofufuruka womasicapuka, duma o malaikat yahino so una wiriwoka.

## O Yesus o Galileaka

**14** So kāgena de o Yohanes witagoka so o bui ma tahuka wisingosa 'dabolo de o Yesus wakahino o Galileano de wosihabari o Gikimoi awi habari 'daloloha, **15** wotemo, "Ma orasi yaadoka so manena o Gikimoi wopareta maro o kolano moi idumuka. Mutuwade niise la nitmaoba de nimatoduba de o habari 'daloloha magena niongaku!"

## O nyawa yaruha o Yesus waaso

**16** Ma orasi o Yesus wotagi o Galilea ma talaga ma dateka de wakelelo o Simon de ma nongoru o Andreas. Ona magena yosoma sababu ona o nao isasari. **17** Kāgena de o Yesus waaso, "O gianongoru, hino ngohi tinidoto ngini so o bi nyawa niadoto ma ngale ngohi la ona imote ngohi imatero maro o bi nao niasoma la niodangado nia deruku!" **18** So ona magena manga soma yodongosa de itagi iwimoteka. **19-20** De o Yesus wotagi wogila-gila de wakelelo o Zebedeus de awi ngopa yasinoto manga rongā o Yakobus de o Yohanes de manga roriwo yamuruo naga. Manga soma isidiahi o deruka. De o Yesus gila-gila waaso o ngopa yasinoto magena, so kāgena de to ona manga baba o Zebedeus de manga roriwo o deruka yadongosa, de ona imajobo so o Yesus iwimoteka.

## O nyawa moi de awi tokaka

**21** O Yesus de awi murl-muri imasidiado o Kapernaum ma dokuka. O Sabat ma wange ma moiku de o Yesus wowosa o Yahudi manga puji ma tahuka de wodoto. **22** O nyawa yosigogigise awi dodoto magena

yohairani de yogawene sababu una wodoto de o kuasaka, de imaketerowa de o Yahudika ma bi guru agama manga dodoto. **23** Ma orasi magena o puji ma tahu ma rabaka o nyawa wikokitoka moi wowosa de womatoore, wotemo o Yesuska, **24** "He Yesus! Ngona ani edekati o kia dede ngomi? Ngona nahino la nomimorutu ngomi? Ngohi toninakoka ngona o Nasaretka ma nyawa duma ngona o sosuio nitetebi moi o Gikimoino!" **25** Kagenade o Yesus wodogore o toka magenaka wotemo, "Nomapopongo, de nosupu o nyawa una manenano!" **26** Kagenade o toka magena 'datoosa so o nyawa magena wisiwawako yapoputuruka de imatoore imaili-ilika. 'Dabolo de o toka magena isupu o nyawa una magenano. **27** O bi nyawa yangodu yohairani poli, sidago ona itemo moi de moika, "Wewe! Manena bai! O Yesus awi dodoto 'damomuane! De awi kuasa una aku wapareta o bi toka isupu, de iise ka unaka!" **28** Magena de o habari ma ngale o Yesus 'datai yogiise sidago o doku o Galilea ma sigilolika.

### O Yesus wasiloha yasisiri de lo yakokitoka

**29** O Yesus wosupu o puji ma tahuno de o Yakobus de o Yohanes lo iwimote wotagi o Simon de o Andreas manga tahuka. **30** De o nyawa isingangasu o Yesuska o Simon ma toroa misiri 'datubuso de o sosahu mitubu. **31** Kagenade o Yesus ami giaka wacoho so womisimomi de milohaka. Gila-gila miputuruka so muna aku ona maleleani. **32** O Sabat ma wange ipasa so 'daputuku de o nyawa yadala yabisisiri de yabikokitoka yatotota o Yesuska. **33** Komagenalo o doku ma nyawa yadadala yahino imatolomu manga tahu ma lolohaka. **34** Komagenade o Yesus yasisiri wasilohaka de yakokitoka manga toka wodusu so imahoika. De wasimahakawa manga toka ibicara sababu o toka lo iwinako una magena naguuna.

### O Yesus wodoto e doku wageto

**35** Ilangi-langi 'daginita waasi de o Yesus womomika, so wosupu o doku ma duduka womatinga so wahika o riho moika, la kagenana una womania.

**36** Duma o Simon de awi dodiao itagi so wisari una. **37** Yahika ma soaka de o Yesus iwimakeka de ona itemo, "We-we, Baba! O nyawa yadala nisari bai!" **38** Duma o Yesus wosango wotemo, "Bolo bato nia'dohaka, la ngone pogila-gila potagi kadoke o doku ma somoaka de tosihabari de lo tadoto o Gikimoi awi habari 'daloloha. Sababu ma ngale o nyawa yangodu so ngohi tahino o dunia manena ma 'dokuka." **39** Kagen a de o Yesus wotagi o bi dokuka de lo o Galilea ma sigilolika so una wodoto o bi puji ma tahu ma rabaka, komagena lo idala manga toka wodusu de wasisaka.

### O Yesus wipapado moi wisiloha

**40** De o nyawa moi wipapado wakahika unaka de wosuba wobukuku. De wogolo wotemo, "Ya Baba, nako nomode, de tanu noisiloha." **41** Magena de o Yesus foloi wigalusiri so awi gia watoa de awi roheka wapa'da de wotemo, "Ngohi tomode, so nilohaka!" **42** So o orasi magena 'dabolo de una wilohaka so he wipadokawa. **43** Magena de o Yesus wisulo woliho de wipoma wotemo, **44** "Upa nodedemo o nyawaka. Cawali nogila-gila o imamka la nitailako. De naaka maro o Musa awi bobita wotetemoka so ani gaso natota o Jou Gikimoika, maro o nonako moi o bi nyawaka igogou ngona nilohaka." **45** Duma una wotagi o nyawa yadadalaka wosihabari so o nyawa yadadala yogiise. So o Yesus o bi dokuka wowosa waakuwa. Ngaroko o Yesus asa ka wahika ma soaka, duma o nyawa o kiano bato yadala icarawa asa yakahika unaka.

### Wolulugu moi wisiloha

**2:1** O wange muruo naga ipasa de o Yesus o Kapernaumka wowosakali de o nyawa yogiise o tahu moika wogoge. **2** So kagen a o tahuka o nyawa imatolomu yadala poli sidago o tahu ma raba yawedo de o ngora lo yatihiwo. So kagen a o Yesus wodoto. **3** So awi manara ma rabaka de o nyawa wolulugu moi awi nyawa yaruha so o kokirobaku iwisitide iwingaho o Yesuska. **4** Kagen a o nyawa yadala poli so idadiwa yahika o Yesuska. Yahika idadiwa so o tahu ma 'dokuye idola de kudaku yapusune

so o jongutuku wingado la kugena o Yesus awi simaku iwisiha. **5** La o Yesus wakelelo manga piricaya ma lamo komagena de wotemo woluluguka, "Ai ngopa, to ngona ani dosa tosiaponguka." **6** Duma kagena de o bi guru agama yamuruo naga imatamiye de manga sininga ma rabaka itemo, **7** "Wobarani bolo! Wotemo woluluguka, 'Ani dosa tahoi.' Ngone panako ka cawali o Gikimoi aku o dosa wahohoi. So awi demo magenena ma meta o Gikimoi wisiceke." **8** Kagena de manga sininga ma takasiri o Yesus wosihoda, so wotemo, "Upa niapikiri koloko to ngini nia sininga ma rabaka. **9** Nako ngohi o nyawa woluluguka totemo, 'Ani dosa tahoi,' de nakoso imahoi eko hiwa ngini nianakowa. Duma nako totemo, 'Nomaoko, de ani jongutu natide, la notagi,' de ngini nianakoka ai buturu iwisilohaka. **10** So ngohi asa towisiloha la asa nianako ngohi o Nyawa ma Duhutu manena o duniaka tahino de ai kuasaka la o dosa tasiapongu." So wotemo woluluguka, **11** "Nomaoko, de ani jongutu naaho la noliho!" **12** De gila-gila o nyawa magena womaoko awi jongutu watoti de womajobo. Magena de o nyawa yadadala ona magena yohairani de yamodo, de o Jou wisimulia. Kagena de itemo, "Ma moi waasi pakelelo maro idadi komagenena!"

## O bi nyawa yahoholu o Yesus waaso

**13** O Yesus de awi muri-muri ikahinokali o Galilea ma talagaka. O nyawa yadadala yahino unaka so una wadoto ona magena. **14** So ma orasi o Yesus kagena wokahlka una wikelelo o nyawa moi o balastengi wototolomu awi ronga o Lewi o Alfeus ma ngopa iwisiaso lo o Matius o kantorka womatamiye. Kagena de o Yesus wotemo unaka, "Nahino noimote ngohi!" Gila-gila o Lewi womaoko de wotagi o Yesus iwimoteka. **15** Ma orasi magena ipasaka o Yesus de awi muri-muri o Lewi awi tahuka imatamiye yoo'do. De o balastengi itotolomu yadala de o bi nyawa yadala manga sininga 'datotorou o bi kawasa yahoholu ona magena ituuru o Yesus iwimote, so ona lo imatamiye yoo'do de o Yesus. **16** Kagena de o bi guru agama yamuruo naga, ona magena o Farisika, o Yesus wikelelo womatamiye woo'do de o balastengi itotolomu de o bi

nyawa ma dorou magena. So o Yesus awi muri-murika yotemo, "Dadoohaso to ngini nia guru woo'do de o balastengi itotolomu de o bi nyawa ma dorou magena?" **17** o Yesus wogiise manga demo-demo magena de una wosango wotemo, "O nyawa yapoputuru upa ma dokterka yahino cawali ka o nyawa yasisiri. Magena imatero maro ngohi tahino taasowa o nyawa imakokodaku, duma ngohi tahino taaso o nyawa ona magena o bi kawasa yadudupawa."

### O dodoto i'do'doma imaterowa de 'damomuane

**18** Ma moili o puasa ma orasi so o Yohanes Wooosi awi nyawa wimomote de o Farisika ma nyawa ona lo ipuasa. Mutuwade o nyawa yahino o Yesuska yosano itemo, "Baba, o Yohanes Wooosi awi nyawa wimomote de o Farisika ma nyawa ipuasa, duma 'dadoohaso to ngona ani muri-muri ipuasawa?" **19** Kagen a de o Yesus wosango de wosiade-ade wotemo, "Ma orasi o kawi ma rarame ma rabaka, de o nyawa yakokoro ona magena io'dowa? Nakoso wokakawi una magena de o nyawa yakokoro yahino kagen a so imatamiye de imatekedodia o de o nali de o more ma dongirabaka bilasu ona yoo'do. **20** Duma done ma orasi imasidiado la wokakawi una magena wingosoka to ona manga sidongirabano. Done ma orasi magena yaakuwa ona io'do. **21** "O nyawa moi lo pamakewa o baju 'damomanalo de asa isitapa de o baro 'damomuane. Sababu ma dadapa 'damomuane magena yalia so asa yaraca o baju magena so itola foloi ilamo. **22** Komagen a lo o nyawa moi lo asa pamakewa o anggur 'damomuane de yoguse ma ngihi i'do'domaku, upa sidago o anggur 'damomuane done asa ma ngihi i'do'doma magena yapolote. Ma dodoguku sinoto lo dosona podahewa. So o anggur 'damomuane magena bilasu poguse ma ngihi lo 'damomuaneku!"

### O sosano ma meta o Sabat ma wange

**23** O Sabat ma wange moiku o Yesus de awi muri-muri itagi yakahika o gandum ma dor o moi o ngeko ma dateka, de awi muri-muri o gandum ma

sopo magena yautu. **24** O Farisika ma nyawa yakelelo de yodupawa so itemo o Yesuska, "Ce! Ani muri-muri gena, igogou o agama ma bobita yatilakuka sababu o Sabat ma wange, de o gandum youtu gena to ngone nanga boboso." **25-26** Kagen a de o Yesus wosango wotemo, "He! Ngini manena ningodu niabacaka duma niawosaka ma Kolano Daud asa waaka 'daboloka, o orasi magena o Abyatar wodadi ma Imam Wilalamo. So ma orasi o Daud de awi nyawa imomote manga ino ihiwa so yasapika una o Jou awi Tahuka wowosa de o roti o Gikimoika isisuba wao'doka. Ena momongo idadiwa nako pamote to ngone nanga agama ma bobita, cawali o bi imam aku o roti magena yao'do. Duma o Daud wao'doka de to una awi nyawa lo wahike so yao'doka. **27** "So ma moisi totemo nginika, o Sabat ma wange o Gikimoi wosidadi gena ma metawa ma ngale o nyawa wonasangisara, duma ma meta ma ngale o nyawa wonariwo. **28** So ngohi manena, o Nyawa ma Duhutu, tapareta o Sabat ma wange so magena lo ai kuasa ma rabaka."

### O nyawa moi awi gia ma sononga isoneka de wisiloha

**3:1** O Yesus wokahinokali o puji ma tahuno de kagen a o nyawa moi awi gia ma sononga isoneka. **2** O wange magegena o Sabat ma wange so kagen a de o Farisika iwinanano nakoso una asa o nyawa magena wisiloha eko hiwa. Manga edekati o Yesus iwitailako de awi sala yasari la iwikalaki. **3** So o Yesus wotemo o nyawa awi gia isosoneka, "Nahino kanena manga simaka nomaokoye!" **4** De o Yesus kagen a o nyawa yadalalaka wosano, "Nako ngini, o Sabat ma wangeka o Musa awi adati o kia ngone aku paaka? O loha paaka eko o dorou paaka? O nyawa pasisalamati eko o nyawa patooma?" Duma ona magegena imapopongoka. **5** Ma ngale manga sininga 'datogoi gena o Yesus awi sininga 'dasiri. So kagen a de una wanano ona de awi doosa, de wotemo una magenaka, "Ani gia natoano." De una awi gia watoa, de awi gia magena ka 'dalohaku. **6** Kagen a de o Farisika o puji ma tahuno isupu de itagi gila-gila so de o Herodes awi nyawa yamuruo naga de imatekesikagaro de imatekefakati ma ngale o Yesus witooma.

## O nyawa yadadala o talaga ma dateka

**7** Komagena 'dabolo o Yesus de awi muri-muri o doku magena yodongosa de yakahika o Galilea ma talagaka, duma o nyawa yadadala iwimote o Galileano, **8** de lo o Yudeano, de o Yerusalemno de o Idumea ma tonano de o Yordan ma selera ma sonongaka, komagena lo o bi doku o Tirus de o Sidonno. Sababu yogiise o kia una waaaka gena, **9-10** kiaka o nyawa yasisiri yadala wasilohaka. So kagena de una wasulo awi muri-murika la o deru moi wisidailako sababu o nyawa yadala poli so done wisidehelo. Sababu o nyawa yasisiri yadala so imatekekajai-jai yahika unaka la manga ngale hitilahi iwipa'da. **11** So ma orasi o nyawa yadadala de manga tokaka wikelelo una, gila-gila ibukuku de manga suba yatide de imatoore, "We! Ngona manena o Gikimoi ma Ngopa!" **12** Duma o Yesus wasibobita de wapoma, upa isingangasu una naguuna.

## O Yesus awi sosulo wahira

**13** So komagena idadika de o Yesus o tala moiye wodola la waaso o bi nyawa nagoona una awi sininga yadahe. So kagena de o bi nyawa ona magena yahino unaka, **14** de una asa wahiri manga sidongirabano yamogiowo de sinoto, ma ngale idadi to una awi sosulo. De wotemo onaka, "Ngohi tinihiri ngini ma ngale ngohi nidupa nidodiao, de tinisulo ngini nisihabari o habari 'daloloha o Gikimoino, **15** de lo ngini ningoduka asa o kuasa tinihike la aku o toka niodusu." **16** So yamogiowo de sinoto to ona manena manga ronga gena: o Simon eko wisironga lo o Petrus, **17** o Yakobus de awi nongoru o Yohanes ena gena o Zebedeus awi ngopa eko ona manena wasironga o Boanerges ma ngale manga demo idala koloko o diwotu; **18** o Andreas, o Filipus, o Bartolomeus, o Matius, o Tomas, o Yakobus una manena o Alfeus awi ngopa, o Tadeus, o Simon gena o Zelot ma nyawa, **19** de o Yudas Iskariot o nyawa una magena o Yesus wisiiiija.

## O bi guru agama o Yesus iwikalaki

**20** 'Dabolo de o Yesus woliho o tahuka. Duma o nyawa yadadala



yahinokali imatoiomu, sidago o Yesus de awi muri-muri iodo lo idadiwa. **21** Komagena awi gianongoru yogiise de itemo, "Una magena witogosaka!" So ona itagi iwingoso la wisigiliho. **22** O guru agama yamuruo naga yahino o Yerusalemno de itemo, "Igogou, una magena o Beelzebul imasiuhoka! O Toka ma Kolano magena asa wihike o buturu la ma ngale o toka wodusu." **23** So kagena de o Yesus waaso o bi nyawa yadadala magena, la wadedemo o ade-ade ngai muruo naga, la wasango to ona manga demo magena itemo o Toka ma Kolano wihike o buturu. De o Yesus wotemo, "O Toka ma Kolano o toka wodusu waakuwa sababu o bolu moi. **24** Nako wodusu magena imatero maro ma kolano awi pareta imakitinga so idadi kanena o bolu moi de kadoke o bolu moi so gila-gila imatekekokudoti; awi pareta asa dasisa de 'dalutu. **25** Komagena lo nakoso o tahu ma raba moi eko aheli moi la imakitinga, cawali o wange de o putu imatekekokangamo, bilasu manga rimoi asa ibiau. **26** De kanagali nakoso o Toka ma Kolano ma pareta ma rabaka la imakitinga de imatekekokudoti, o pareta magena asa idadikawa so bilasu 'dasisa de 'dalutu. **27** "Naguuna lo wotemo waakuwa wowosa o nyawa moi wipoputuru awi tahu ma rabaka de awi arata wakoora nakoso o tahu ma duhutu magena wipiliku waasi. So bilasu una o tahu ma duhutu wipoputuru magena wipilikukasi de asa wotagi la awi arata wakoora. **28** "Igogou, to ngone nanga dosa paaaka 'dangodu de nanga demo 'datotorou nagoonaka bato gena ngone nanga dosa o Gikimoi aku wonasiapongu. **29** Duma nakoso o demo ma dorou de posiceke o Gurumi 'Datetebi ngone magegena o apongu pamakekawa ma bati sidutu o kakali. Potetemo gena paaka o dosa ikokakali." **30** O Yesus wotemo komagena sababu ona magena iwitemo una o toka wingosaka de magena imatero de o Gurumi 'Datetebi patemo 'datorou.

## O Yesus ma awa de awi gianongoru

**31** Magena 'dabolo de o Yesus ma awa de awi gianongoru yahino. So yaado o tahu ma duduka de o nyawa moi iwisulo o Yesus wiaso. **32** O orasi magena o nyawa yadala imatamiye de o Yesus una ma dongirabaka

so yotemo, "Kodo! Baba, ani awa de ani gianongoru kadoke naga ma duduka itamaha bai, ona nisari ngona, Baba." **33** Kagen a de o Yesu s wosango wotemo, "Ngohi tinidedemo nagoona to ngohi ai awa de ai gianongoru ma duhutu." **34** 'Dabolo de una womaginano, o nyawa imatatamiye magena de watumu moi-moi de wotemo, "Hika niakelelo ona manena to ngohi ai awa de ai gianongoru tasiboboboso: **35** O nyawa nagoona ai Baba o Gikimoi awi demo yamomanara, una magena to ngohi ai gianongoru de muna magena to ngohi ai awabira de lo muna magena to ngohi ai awa."

### O ade-ade o gisisi wosihahaja

**4:1** O talaga Galilea ma dateka o Yesu s o nyawa yadadala wa-dotokali. Sababu o nyawa yahino yadala poli, de o deru moi o ake ma 'dokuka so una wopane de womatamiye. De o nyawa yadadala magena imaooko o talaga ma dateka. **2** Kagen a o Yesu s wobicara de to una awi ade-ade. So komagen a de una o ade-ade moi wasibicara onaka, **3** "He! Ngini ningodu niise! Kanaga wototoro moi wotagi awi gisisi wosihaja. **4** So de una wosihaja de ma sononga o ngekoku itura, so o namo yahino de yao'doka. **5** Ma sonongali itura o tona 'datetetoku de ma tona ka ma cunu. So o gisisi magena ma goho isupu 'datai sababu ma tona ilamowa so imasingutu 'datai. **6** Duma ma ngutu ka ma cunu, so de o wange yodisiwa de o goho magena 'damalai so isoneka. **7** De ma sonongali itura o tona 'datototopo ma rabaku. La o gisisi magena ioho imateke-kangaho de o totopo so o totopo magena asa yalalo so isopowa. **8** O gisisi ma sonongali asa itura o tona 'dalolohaku. So ioho ma goho ifero 'daloha de ma hutu alamo so isopo. Manga sopo kanaga 'daloha sidago ma dala ngai moruwange de ma binuka 'daloha sidago moributanga de ma binukali 'daloha sidago lo o ratu moi." **9** So wajarita 'daboloka, de wotemo, "He, ngini de nia ngauka tanu niise la nianako."

### O Yesu s de to una awi ade-ade

**10** Ma dongoho o Yesus wodoto 'dabolo so ka womatengoka de awi muri-muri yamogiowo de sinoto de o nyawa wimomote yamuruo naga imasano o Yesuska tanu awi ade-ade ma ngale gena wasingangasu onaka.

**11** So o Yesus wotemo onaka, "O kia ngini niananakowa sidago o orasi manena, o Gikimoi winihiri la winihikeka o ade-ade ma ngale so 'dangodu aku nianako ma ngale idodooha o Gikimoi wokolano de wopareta. Duma nakoso o nyawa o Gikimoi wimomote waasi la wadoto bilasu de awi ade-ade. **12** La asa idadi maro o kia isilelefo o buku ma rabaka; 'Ona magena ka yoise, duma isidodoguwa; ona magena cawali yodupa iise, duma ma ngale gena yasaheha. Sababu nakoso yanako asa itoba de imatoduba moi-moi manga dorouno, de o Gikimoi asa wahike o apongu onaka; duma ona asa yanakowa."

### O ade-ade o gisisi ma ngale de ma dodoto

**13** So 'dabolo de o Yesus wotemokali onaka, "Nakoso ngini nisidodoguwa o ade-ade magena, de aku ngini nisidodogu o ade-ade ma somoali? O ade-ade magena ma ngale komanena: **14** O nyawa wototoro o gisisi wosihahaja ena gena o nyawa o Gikimoi awi demo wosihohabari. **15** O gisisi ma binuka itutura o ngekoku de o namo yao'doka, gena imatero bato o nyawa yoiseka o Gikimoi awi demo, duma gila-gila o Toka ma Kolano yahino de yakooro to ona manga sininga ma rabano so isisaka. **16** O gisisi ma binuka itutura o tona 'datetetoku ioho duma 'damalaika, gena imatero bato o nyawa yoise o habari 'daloloha de gila-gila imagese de manga sininga isosanangi. **17** Duma koloko ma ngutu ilukukuwa, so ona yongaku itekawa. So de o susa yamake de ma ngale o habari 'daloloha yasidibitu, de gila-gila ona wipalako ma Jou so imakiliho de ikafirika. **18** O gisisi ma binuka itutura o tona 'datototopoku so o totopo yalalo so isoneka, gena imatero bato o nyawa o habari 'daloloha magena yoiseka. **19** Duma ona magena isihawateri ma ngale manga oho, de lo yodupa yokaya de lo imau o sanangi ma rabaka igoge. Komagena o Gikimoi awi demo yosingoukawa de o manara 'daloloha lo yodupakawa. **20** De o gisisi itutura o tona 'dalolohaku ioho 'daloha, gena imatero bato o nyawa o

Gikimoi awi demo magena yoiseka de imagese de manga sininga ma rabaka imadiahi, so o manara 'daloloha yaaka. Kanaga manga manara 'daloha sidago ma sopo moruwange, kanaga manga manara 'daloloha sidago ma sopo moributanga, de kanaga lo manga manara 'daloloha sidago ma sopo o ratu moi."

### O ade-ade o poci de o doduga

**21** Kagen a de o Yesu s woade-ade ma ngale o poci imatero de o Gikimoi awl habari 'daloloha de wotemo onaka, "Ngone o poci patupuka de paaho gena upa o kula posimotu, eko upa o dangi ma litimika pahado, duma bilasu pahado o poci ma todengeka la ma nita yakelelo. **22** Sababu o kia naga moi lo paiihu done asa pakelelo de lo o kia naga moi lo patotalake done ka ideweda. **23** O nyawa nagoona de manga ngauka ma ngale imasigise tanu ona iise." **24** Kagen a de una wotemokali, "Niatagapi nia siningaka de nimadiahi o kia ngini niiiseka. So o kia niiiseka ma manara magegena bilasu ngini niasipake o nyawaka sababu done asa nginika o Gikimoi nisipakekali de ma boloika. **25** So nagoona o Gikimoi awi demo yoise la manga siningaka imadiahi, done o kanako magena de ma boloika asa wasidogo onaka. Duma nagoona manga kanako manga siningaka la ka ma cunu, done asa wa'dehekali."

### O ade-ade o gisisi iooho

**26** Kagen a de o Yesu awi bicara wadofakali, de wotemo, "O Gikimoi wopareta maro o kolano gena posiade-ade imatero maro o nyawa moi o gisisi wosihaja awi doroka. **27** O puputu womaiduka so 'daginita una womomi. De o orasi magena o gisisi magena iooho so idadi ilamo de ikuruka. Duma una wosidodoguwa idodooha o gisisi magena iooho sidago ilamo. **28** O tonaka maena iooho masirete so isisupu ma noma-noma ma uma, bolo de ileru, de lo isopo. **29** So de o tamo magena 'daosaka gila-gila o nyawa una magena wautu sababu o gugutu ma orasi yaadoka.

### O ade-ade o sasawi ma sopo

**30** 'Dabolo de o Yesus wotemokali, "O Gikimoi wopareta maro o kolano posiade-ade, **31** koloko o sasawi ma sopo ngai moi o tonaku podato. Ngaroko o sasawi ma sopo magena ifoloi 'daceke de o sopo ma somoa o dunia manena ma 'dokuka, **32** duma nako o sopo magena posihaja la ioho ma goho asa ilamo ifoloi de o ngangaru ma somoa, de iuma-uma so o bi namo asa yahino imaigu de imataru ma litimika." **33** O ade-ade idala ma rabaka maro komanena isingangasu o Gikimoi awi habari 'daloloha o nyawaka, imamote de to ona manga sininga ma buturu la yasahe de yanako. **34** So o Yesus wadoto o nyawa ona magena wapake o ade-ade duma o ade-ade ma ngale magena to una awi muri-murika wasingangasu wasitotiaika.

### O Galilea ma talagaka o Yesus o paro wosiogo

**35** O ade-ade wosibicara 'dabolo o deru ma rabaka so ima'da-ma'da de o Yesus wasigaro awi muri-muri, "Hino la ngone pomasisihito o talaga ma sonongaka." **36** Kagenana de o Yesus awi muri-muri lo yopane o deruku. De o nyawa yadadala yadongosaku o talaga ma dateka. De o deru ma somoa lo kagenasi. Duma o Yesus de awi muri-muri imajoboka. **37** So asa yahika o talaga ma dongirabaka de o paro de o rato 'dasosihilo de o moku-moku imasidiado. So manga deruku o ake yobane sidago manga deru he ikiloro. **38** Kagenana de awi muri-muri lhawateri duma o Yesus asa womaidu womagerenaye o deru ma doduuruka so wikioloka. So yotagi iwisisimomi de ona imasigaso, "Ya Baba! Ya Guru! 'Dadoohaso nomi-'dohaka, done inasigiloro!" **39** La o Yesus womomi so wotemo o paroka, "Noogo!" De o moku-mokuka wotemo, "Norihi!" De gila-gila o paro magena iogoka de o talaga magena lo irihika. **40** De wotemo onaka, "Ngini nimodo ilalamo! He, to ngini nia piricaya ka ma cunu!" **41** Magena de asa awi muri-muri de manga modo ma rabakasi de ona imatekebicara moi de moika de yotemo, "Una naguuna sidago o paro de o moku-moku lo ka wisigise!"

### Yakokitoka wisiloha o Gerasa ma daeraha

**5:1** Yesus de awi muri-muri o Galilea ma talaga ma dongirabaka de yakahisa de imasidiado o Gerasa ma daeraka. **2** Kagen a de o Yesus o deruku wouti de imakamake o nyawa wikokitoka moi wotagi wokahoko o sone ma diaruno wosupu. **3-4** O wange isigeto-geto de wikokitoka magena awi goge o diaruka. Nako o bobiliku de o rate wisipiliku de ka watola. Iwipiliku yaakukawa de wirateka lo idadiwa. Iwisirihi lo yaakuwa sababu una foloi wiputuru. **5** O wange eko o putu lo, o talaka de o diaruka, womatotoore de o teto wacoho de womasisisika la woma'dabo. **6** So o deruku youti waasi de wikokitoka una wakelelo ona magena so womagogora wahoko o Yesuska de wosuba wobukuku. **7-8** Duma o Yesus wosulo wikokitoka una magenaka de wotemo, "He toka, o nyawa una manenano nisupu!" Kagen a de ma toka imatoore de itemo, "Yesus, o Gikimoi Wikukuruye ma Ngopa, noidooha ngohika! Togolo o Gikimoika najaji, kodo, upa noisangisara!" **9** De wosano, "Ani ronga naguuna?" "Ai ronga o Dala, sababu ngomi manena o toka midadalaka." **10** De igolo Yesuska, la upa o daera magenenano wasisupu. **11** O orasi magena de o titi o cala sinoto o pido magenaka o ino imasari. **12** De ma toka imagolo o Yesuska, "Nako 'daloha de o titika nomisidusulo la asa o titika miwosa." **13** Magena de wasimaha so o nyawa wikokitoka widongosaka de o titika yowosaka. O titi ma duduo magena ilo'da kagen a de o dirasuku itura so 'dangodu 'dalutu de isoneka. **14** Imaaka komagen a de o titi yasosowohi gena yolo'da de itagi o doku de o soaka isihabari. So o nyawa ma somoali yahino de yatailako. **15** Kagen a de o nyawa una magena witogosakawa so womabajuka de awi sininga itiaika. Ona magena iwikelelo de yamodo. **16** De ona o Yesus awi manara yakokelelo gena yacarita idodooha so o nyawa wikokitoka magena wisilohaka de lo ma ngale o bi titi magegena. **17** Komagen a so o Yesus iwisimahawa kagen a wogogoge so asa una iwisulo wosupu manga daerano. **18** Kagen a de o Yesus manga deruku wopaneka de o nyawa wisilohaka gena foloi wogolo o Yesuska la tanu iwimote. **19** Duma wisimahawa so wisulo de wotemo, "Nolihokasi de nodedemo ani nyawaka o Jou awi siboso ma manara ilalamo waaka ngonaka." **20** So o nyawa magena womajobo de wotagi o doku mogiowo ma daeraka wosihabari ma ngale o Yesus awi manara 'daloloha unaka; de

o nyawa yangodu yogogiise gena yohairani icarawa.

## O Yairus ma ngopa, de o ngope'deka o au mosidadagi

**21** O Yesus wokahinokali o talaga ma sonongano. Kagen a de o nyawa yadadala yahino, imatolomu o Yesus o talaga ma dateka wisigiloli. **22** De o nyawa moi o puji ma tahu wapopareta o doku magenaka awi ronga o Yairus una magena o Yesus wikelelo de wahino awi simaka wosuba wobukuku, **23** de wogolo ifoloi unaka, "Jou, ai ngopa o ngope'deka moi tomisiboboso ami siri 'datubuso poli. Tanu nahino la noimote de nomipa'da, la ami siri 'datotubuso magenena itogu la upa mosone." **24** Magena de o Yesus wotagi o Yairus wimote de o nyawa yadadala lo imote, de o Yesus iwisidehelo. **25** Kagen a manga sidongirabano o ngope'deka moi o ngoosa mamakesi so itekaka o au mosidadagi de itogu waasi he o taungu mogiowo de sinoto 'dabolo. **26** O dokterka gena yadalaka motagi momasou de ami sangisara yodogo so ka o sou momasibangu sidago lo ami pipi 'damata. Duma kodo milohawa, salanta mipanyake gena foloi idogo. **27-28** De o ngope'deka magena mogiise o Yesus wakahino. De muna ami sininga ma rabano ibao, "Hitilahi awi jubaka tomasimaho bato, la ngohi asa ilohaka." So muna o nyawa yadadala manga sidongirabano o Yesus mowidalate de awi duduno mototuuru de momasimaho o Yesus awi jubaka. **29** De o orasi magena 'dabolo de o au mosidadagikawa. Kagen a de muna momamalo ami siri magena 'dalohaka. **30** Komagen a de o orasi magena 'dabolo o Yesus wamalo awi buturu isupu to una awi rohen o. De womakiliho de wasano o nyawa yadadalaka, "Nagumuna ai jubano matigi?" **31** De o Yesus awi muri-muri itemo, "Baba, ngona nakelelo masirete. O nyawa ma dala magena imatekesidehelo de, Baba, ngona nosano nagumuna ani jubaka matigi!" **32** Duma o Yesus womaginano hika de hino wasari naguuna awi jubaka matigi. **33** Kagen a de o ngope'deka momanako ami siri magena 'dalohaka. So mohawateri de mitirine de awi simaka mosuba mobukuku, de momasingangasu ma gogou, "Ngohi ani jubaka tomasimaho de gila-gila ai siri 'dalohaka." **34** Kagen a de o Yesus wotemo o ngope'deka

magenaka, "He, ai awa, sababu ngona noipiricaya so ngona nilohaka. Notagi de upa nohawateri sababu to ngona ani dubuso de ani siri lo ihiwaka." **35** So de o Yesus ka wobobicarasi, de o Yairus awi tahuno o sosulo yamuruo naga yahino. De ona magena wisibubusu o Yairuska de itemo, "Upa ngona ma Baba Guru nowigololi, sababu ani ngopa mosoneka!" **36** La de o Yesus woise, de ka wotemo o Yairuska, "Upa ani sininga itura, ka nopiricaya bato!" **37** De o nyawa ma somoa wasimahawa, ka cawali o Petrus de o Yakobus de lo o Yohanes, ona yasinoto ria de nongoru, wasimaha iwimote o Yairus awi tahuka. **38** So de ona imasidiado de o Yesus wakelelo o nyawa yadadala yahika yahino de ikalala de lo yododora manga ili yapoputuruka sababu mosoneka. **39** Kagen a de o Yesus wowosa de wotemo onaka, "O ngopa manena mosonewa, duma mikioloka, so upa nikalala de niari!" **40** Duma o nyawa yadadala magena iminako o ngopa muna magena mosoneka, so ona yangodu o Yesus wisiiha. De o nyawa yangodu magena wadusu so isupuka de o Yesus wangaho o ngopa magena ma awa de ma baba de awi muri yaruwange, so o ngihi kiaka o ngopa magena ami bake yahado kagen a iwosa. **41** De o Yesus wacoho ami giaka de wotemo munaka, "Talitha kumi!" O Yahudika manga demo magena ma ngale, "He, ai ngopa, nomomi!" **42** O ngopa ami umuru o taungu mogiowo de sinoto magena gila-gila momomi de motagi. Yangodu mikelelo momomi de motagi gena ka yohairani icarawa. **43** Duma o Yesus wotemo de awi demo 'daputuru, "Upa lo ngini nisihabari nagoonaka bato!" De wotemo ami dodihimoka, "Hika muna o ino nimihike la moo'do."

## O Nasaretka o Yesus widupawa

**6:1** O Yesus de awi muri-muri imajobo so itagi to una awi soa de awi dokuka. **2** O Sabat ma wangeka de una wodoto o puji ma tahuka. Kagen a o nyawa yadala yoise to una awi dodoto de ona yohairani so itemo, "Nagoona widoto so to una awi pade de awi cawaro maro komagen a? De to una awi kuasa kiano wamake so aku waaka o nonako ihahairani? **3** Igogou! Una manena cawali o tahu woaaka moi, ma awa gena ongo



Maria, de awi nongoru o Yakobus, o Yoses, o Yudas, de o Simon. De awi bira lo kanena igoge so pomakodoku moi." So ona yodupakawa yoise maro o kia una wotetemo gena, sababu ona winakoka una magena kiano. **4** Kagen a de o Yesus wotemo onaka, "O nabi moi asa iwisihoromati gena o bi doku de o bi soa ma somoaka bato, duma ka cawali awi doku de awi soaka de awi gianongoru de awi awabira gena iwingakuwa." **5** O riho kagen a o nonako ihahairani idalawa waaka so ka cawali o nyawa yamuruo naga yasisiri de ka awi gia wasipa'da de yalohaka. **6** So o Yesus wohairani 'dadoohaso ona manga piricaya ihiwa.

### O Yesus awi muri yamogiowo de sinoto wasulo

Magen a de o Yesus wotagi o bi doku ma sigilolino wageto-geto so una wodoto. **7** O Yesus awi muri yamogiowo d© sinoto watolomuno, la o kuasa wahikeka ma ngale o toka yodusu de wasulo so itagi yasinoto. **8** Duma una o siminiko wadedemokasi wotemo komanena; "Nia dodagi ma rabaka upa lo o kia naga nimagaho, cawali ka o didiki. Upa o maru nimagaho eko o pipi eko o sasao. **9** Nia tarupa nimasitibaku de nia baju gena ka nia roheka." **10** De wotemoli, "Nakoso o doku moika niwosa de ka o tahu moika nimasidodogu de upa nimatotuluru ma bati o doku magena niodongosa. **11** Duma nakoso o riho moika la nitulu, de ni'dehe 'dalohawa sidago o habari 'daloloha magena lo yoise iholu, o riho magena niodongosa. Duma nia 'dohu ma gaapo niaparikasi la imaaka o nonako moi onaka, sababu ona magena de manga fajaka o Gikimoi awi simaka." **12** Kagen a de ona itagi isihabari ena gena o nyawa yangodu bilasu itoba de imatoduba to ona manga dosano. **13** Igogou! O Yesus awi muri-muri o toka idala yodusuka, de o nyawa yasisiri manga saheku o gososo isiese so manga siri lo 'dalohaka.

### O Yohanes Wooosi awi sone ma jarita

**14** Ma orasi magena ma Kolano Herodes wise ma ngale o Yesus de awi nonako ihahairani sababu kagen a o nyawa yadadala yaaka idadi manga uru

ma beto. Sidago yaado o doku de o soaka so o bi nyawa itemo, "O Yesus gena o Yohanes Woosi asa woohokali! Ma sababu magegena una wamake o buturu la waaka o nonako ihahairani." **15** Duma o bi nyawa ma somoa itemo, "Una magena ma nabi o Elia woohokali." De ma binukali itemo, "Una manena o nabi wimomuane moili koloko o nabi o orasi i'do'domaka." **16** So kagenade ma Kolano Herodes wogiise komagenade una wotemo, "Ka o Yesus una manena o Yohanes Woosi! Kiaka i'do'doma tasulo awi sahe yatolaka de manena woohokali!" **17-18** Ma sababu komagenade ma Kolano Herodes womasininga ena gena ma orasi i'domaka de ongo Herodias ma Kolano Herodes womikawika. Muna magena o Herodes ma nongoru masirete awi ronga o Filipus ma pe'deka. De o Yohanes he ma para ma dala wisidapano de wingamo o Herodeska, "Dalohawa nako ngona nomikawi ani nongoru ma pe'deka sababu muna magena ani mo'doka!" So o Herodes wasulo awi nyawaka o Yohanes iwitago la o bui ma rabaka wisingosaka. **19** Sababu ma ngale o Yohanes awi sidapano de awi ngamo magegena ongo Herodias mitoosa so o ngeko mosisari la ami edekati o Yohanes mowitooma, duma o Herodes iwijaga so o ngeko ihiwa. **20** Ma Kolano Herodes wosulo o buika o Yohanes iwijaga iwisidodiahi, sababu iwinako o Yohanes una magena awi siniga iloa de ibanari de lo una magena o Gikimoi awi sosulo so wisubaka. De moili o Yohanes awi bicara o Herodes wodupa wise ngaroko wisigamamuka. **21** Ma dodoguka ongo Herodias ami orasi mamake ma Kolano Herodes awi sibuo ma wangeka so o Herodes waaka o raramede wakoro o bobareta yangodu de awi kapita-kapita de o bi kawasa ma roriri to una awi pareta ma rabaka o Galilea ma dokuka. **22** O raramede magena ma rabaka ongo Herodias ami ngopa moselo so ma Kolano Herodes de o nyawa wakokoro ona magena lo midupa icarawa. So kagenade ma Kolano Herodes wotemo, ma jojaru magenaka, "Ngona o kia nodupa? Nagolo bato! Ngohi asa tonihike ngonaka." **23** So kagenade ma Kolano Herodes wojaji o jojaru muna magenaka ma bati wosasi. Ma Kolano Herodes wotemo, "O kia bato ngona nagolo ngohi asa tonihike ngaroko ai arata ma sononga moi ai tahu ma rabaka tonisitodihikeka!" **24** 'Dabolo de o jojaru magena mosupu de mosano ma awaka, "Ai awa, 'daloha gena

bilasu o kia tomagolo?" Ma awa mosango, "Hika nagolo o Yohanes Wooosi awi sahe." **25** O jojaru muna magena momatai-tai mokahika ma Kolano Herodeska de motemo, "Ngohi tomagolo o Yohanes Wooosi awi sahe, so o orasi manena 'dabolo o pigaku nongado la noihike ngohika!" **26** Ma Kolano Herodes woise ami gogolo magena de to una awi sininga ipeleso, duma ami gogolo magena watolabutu idadikawa sababu wosasika awi nyawa wakokoro manga simaka. **27** So una gila-gila wisulo ma kapita moi wotagi o Yohanes Wooosi awi sahe wa'dehe. So kagen a de o pajuriti moi wotagi o bui ma tahuka so o Yohanes Wooosi asa witolaka. **28** So de witola 'dabolo de o sahe magena o pigaku wongado de wotagi wahike o jojaru magenaka. De o jojaru magena mahikekali ma awaka. **29** O hali magena o Yohanes Wooosi awi muri-muri yogiise de yanako, gila-gila ona itagi o Yohanes Wooosi awi bake ya'dehe so yapoosuka.

### Yanau yacala motoha o Yesus wasio'do

**30** La o Yesus awi sosulo asa ikahinokali imatolomu de o Yesus. Ona o manara yaaaka de yadodotoka 'dangodu isingangasu unaka. **31** Kagen a o nyawa idala icarawa yahino de binuka iliho duma yadadala yahinoli sidago o Yesus de awi sosulo io'do lo imadodoohawa. So o Yesus wotemo onaka, "Niahino potagi la pomatinga o riho moika la ngini nimasiwomakasi." **32** Magena de imajobo o deruku ipane so imatinga o pido moika. **33** So de o nyawa yadadala yakelelo imatuluru o riho moika de yanako ona magena nagoona. So o nyawa o bi doku ma sigilolino magena itagi itowongi so i'domaka o riho kiaka o Yesus de awi sosulo yamemetaka gena. **34** Ma orasi o Yesus o deruku wouti, una wamake o nyawa yadala icarawa. So una wagalusiri onaka, "Kodo! Ona manena koloko o duba ma sowohi ihihiwa." Magena de una o moi-moi wasidoto idala o nyawa ona magenaka. **35** So de 'dama'da-ma'da de o Yesus awi muri-muri itemo unaka, "Upa sidago 'daputu sababu o riho manena imatingano. **36** Nakoso 'daloha, o nyawa yadadala manena nasulo itagi la ona o ino imaija o doku de o soaka." **37** Duma o Yesus wotemo, "Ngaroko he upa! La ngini bato niasio'do!" De ona itemo, "Nakoso o

nyawa manga dala manena de miasio'do gena ma pipi o kiaka po'dehe de o roti miija la miasio'do!" **38** Kagen a de o Yesus wosano, "Kagen a naga de nia maru? Hika nitagili o nyawa yadadalaka niatailako." So ona yatailakoka de yotemo, "De maena duma cawali o roti ngai motoha de lo o nao ngai sinoto." **39** So o Yesus wosulo awi muri-murika, "Hika o nyawa yadadala magena niasigogeku o dumule ma 'dokuka imatolomu." **40** So o nyawa yadadala magena imagoge imarihi-rihi. Kanaga o dolomu ma nuka yararatu moi de lo o dolomu ma nukaii yamomoritoha. **41** So kagen a de o Yesus o roti ngai motoha de o nao ngai sinoto wa'dehe de womantataga o dipaye de awi sukuru watide o Gikimoiye. 'Dabolo de una o roti magena watepi-tepi de awi muri-murika wahlke la ona yasitoku o nyawa yadadalaka magena. Komagen a lo o nao ngai sinoto waaka so yasitoku o nyawa yadadalaka magena. **42** La o nyawa yadadala magena yao'do sidago yapunu. **43** So kagen a de io'do 'dabolo de awi muri-muri o ino ma soohu yatolomu so ma boloi yamake o karaja mogiowo de sinoto. **44** O ino yaoo'do magena ka yanau gena yacala motoha. (O ngope'deka de o ngopa gena yaetowa.)

## O Yesus o ake ma 'dokuko wotagi

**45** La magena 'dabolo de o Yesus wotemo awi muri-murika, "Nitagi o deruku nipane la niside kadoka o doku Betsaida o talaga ma sonongaka. Ngohi asa o nyawa yadadala ona magena tasulo ilihokasi." **46** So de o nyawa yadadala magena ilihoka, de o Yesus o pido moika wakahika la womania. **47-48** So de 'daputuka de o deru magegena o talaga ma dongirabaka yahika de yohoru isangisara sababu o paro manga simano. O Yesus o dududuka womatengoka duma awi muri-muri o deru ma rabaka gena ka wakelelo. So he 'daginita de o Yesus wahika onaka de o ake ma 'dokuko wotagi. Duma o Yesus asa wahika manga deru ma dateka, **49-50** de awi muri-muri wikelelo o ake ma 'dokuko wotagi. Ona magena wikelelo una o ake ma 'dokuko watagi de ona isawangi so imatotoore, "We! O toka! O toka!" So imasidotirineku. Duma gila-gila o Yesus woaso de wotemo, "Nia sininga niapoputuru, ngohi manena o Yesus so upa

nimodo!" **51** La una wahika so manga deruku wopane de o paro magena itoguka de iogoka. So o Yesus awi muri-muri magena yohairani icarawa, **52** sababu kagunugo asa o nonako ihahairani wasikeleloku ma ngale o roti ngai motoha duma manga sininga 'datogoi icarawa. So isusa ona isihoda de yasahe to una awi buturu komagena ma lamo.

## Yasisiri o Genesaretka o Yesus wasitogu

**53** Ma orasi o Yesus de awi muri-muri imasidiado o talaga ma sonongaka de o Genesaret ma bobanesa itahu so kagena manga deru yatapuku. **54** Magena de ona o deruno isupu so o Yesus wikelelo de o nyawa gila-gila winako. **55** So imagogora moi-moi manga dokuka itagi so o nyawa yasisiri manga jongutuku yasitide de o Yesuska yangaho kiaka yogiise una kagena naga. **56** Komagena lo kiaka bato una wotagi o bi soaka eko o bi dokuka, ona o nyawa yasisiri o pasar ma dateka yahahadoku de igolo unaka, "Baba Guru, nako nomisimaha hitilahi ani juba ma ngoguka sutu miacoho!" La o nyawa nagoona yacocoho gena manga siri itoguka.

## O Yesus de o Farisika imatekesikokoholu ma ngale manga gia ma diodo

**7:1** O wange moiku de o Farisika ma nyawa o bolu moi, de o guru agama yamuruo naga o Yerusalemno yahino de itagi imatolomu o Yesuska. **2-4** O Yahudika ma nyawa yangodu ma boboloi o Farisika ma nyawa ona magena o adati de o galepu yacocoho, ka o ete de o toporasi. O galepu ma dodagi magena yamote so ona magena io'do waasi, nakoso manga gia yatiodo waasi. Kamagena lo o pasarka itagi la ilihono bilasu manga gia yatiodokasi de asa io'do. De kanaga idalasi o ete de o topora manga adati de manga galepu yacocoho ma bati orasi manena, maro o lelenga de o boso eko o hito ma leleani patiodo lo de ma galepu. So ma orasi ona itagi imatolomu gena ona yakelelo o Yesus awi muri-muri io'do de manga gia yatiodowa de yamotewa manga adati de manga galepu, ena gena bilasu manga gia yatiodokasi imamote maro o kia o Farisika yotetemo gena. **5** Ma sababu magegena o bi Farisika ma nyawa de o bi guru agama o

Yesuska wisano, "He! 'Dadoohaso ani muri-muri io'do de manga gia yatiodowa? De kiaso ona yamotewa to ngone nanga ete de nanga topora manga jojoho?" **6** Kagen de o Yesus watemo, "Igogou, ngini manena nitotodamatoko! So itero maro ma nabi Yesaya wotemo i'domaka de wosilefoka ma ngale ngini manena. Ena gena, 'O Gikimoi wotemo komanena, O bi nyawa ona magena ihoromati ngohi, cawali manga uru ma kahika, duma manga siningaka gena ihiwa. **7** Ma faida ihiwa ona isuba ngohika, sababu o adati de o galepu to nyawa yadoto, itemo magena koloko to ngohi ai bobita!" **8** "O Gikimoi awi bobita ngini niapalako duma o bobita o nyawano ngini niacoho niaamo-amo." **9** La o Yesus wotemoli onaka, "Igogou, ngini nicawaro so o Gikimoi awi demo niabultitu ma ngale nisilaku to ngini nia adati de nia galepu masirete. **10** O Musa o bobita winihikeka gena, 'Niahoromati to ngini nia baba de nia awa,' de 'Nagoona manga awa de manga baba la yatemo 'datorou ona magena manga fanggali bilasu yatooma.' **11** Duma ngini niasidoto o nyawaka: Nakoso o nyawa moi awi dodihimoka wotemo, 'Ai baba de ai awa, ngaroko o pipi ngohi bilasu tinihike nginika magena ka to ngohi ai suba o Gikimoika,' **12** o nyawa una magena wisimahaka ma baba de ma awa upa wariwo. **13** Ma ngale de to ngini nia dodoto masirete aku o nyawa ona magena yacoho manga adati de manga galepu, duma o Gikimoi awi demo de awi bobita ngini niapalako. Kanaga idalasi o damato de o gulai ngini asa niaaaka imatero komagenena."

### O kia naga moi o nyawa yasitorou

**14** La o Yesus waasokali o nyawa yadadala magena de wotemo onaka, "Hika niise to ngohi ai ade-ade manena la ngini asa niasahe de nianako. **15** O kia ngone pao'do la iwosa nanga rabaku de aku inasitorou? Hiwa! Cawali o kia nanga rabano isusupu magena 'dafaja. **16** So nakoso de nia ngauka ma ngale nimasigise tanu ngini niise de niasigogiseka." **17** Ma orasi o Yesus o nyawa yadadala wadongosaku so wotagi o tahuka wowosa de awi muri-muri yosano unaka, ma ngale idodooha to una awi ade-ade magegena. **18** Kagen de o Yesus wotemo onaka, "Ce! So niiseka

de ka niasahe waasi! 'Dadoohaso ngini niasahewa, ena gena o kia una wao'doka una magena o dorouka wingahowa, so upa nitemo una witorou. **19** Sababu o kia wao'o do magena to una awi siningaku iwosawa duma iwosa awi pokoku so ma duuru de wosihoho so isupukali." (De o Yesus awi demo manena una wasingangasu, so o ino 'dangodu gena aku ngone pao'do.) **20** So kagen de o Yesus wotemokali, "O kia bato o nyawa manga bi rabano isusupu yasitorou ona magenaka. **21** Sababu manga rabano, ena gena manga siningano, asa ibao so manga manara isidodarafa, itotosi, itotooma, **22** isusundali, yatotodamoto, ronga ma dorou iaaka, de lo o akali ma dorou yapapake; yatotesere, manga adati ihiwa, yatotodoosa, imakodaku, de isusa padoto sababu manga sahe 'datogoi. **23** O bi dorou 'dangodu kiaka ibabao to ona manga sininga ma rabano, magena yasadadi o nyawa ona magena o nyawa ma dorou." **24** Kagen de o Yesus wodongosa o riho magena.

### O ngope'deka moi o Siria Fenisiano ami piricaya

So de o Yesus wotagi o doku Tirus ma sigilolika de wowosa o tahu moika womamingihu la o nyawa upa winako una kagen naga. Duma awi habari i'domaka so o nyawa winakoka. **25-26** De lo o ngope'deka moi mogiiseka, muna magena o Siria ma dokuno o Fenisia ma tonaka so o Yahudika ma nyawa misowo. To muna ami ngopa moi o toka mingosa so mitogosaka, so muna motagi o Yesuska, de mobukuku de ami suba matide de mogolo la o Yesus aku o toka wodusu ami ngopa magenano. **27** Kagen de o Yesus wosango de wotemo munaka, "Bilasu ngona notamaha la o bi ngopa o ino pahike i'doma de io'do yapunuka. Sababu 'dalohawa o bi ngopa ma ino de pa'dehe so o kasoka pongike." So o Yahudika wosiade maro o bi ngopa, de o nyawa ma bi somoa wosiade maro o kaso. **28** De o ngope'deka muna magena mosango motemo, "Kodo, Baba! O bi kaso o meja ma litimika lo yodamaha o bi ngopa manga ino ma reremo, la nako itura de o kaso magena lo aku yao'do." **29** De o Yesus wotemo munaka, "Sababu ani sosango itero de nagogou ma loha, o orasi manena 'dabolo ani ngopa ami toka asa imahoi de mitogosakawa. So notagi la noliho ani

dokuka." **30** O awa muna magena moliho ami tahuka de momimake ami ngopa mitotogosa magena momaiduka sababu milohaka de igogou ami dogosa lo isisaka.

### Womomou moi o Yesus wisiloha

**31** O Tiruska womajobo o Sidon watilaku de asa wotagi o Galilea ma talagaka. Womasidiado o doku mogiowo ma daera ma rabaka de **32** O nyawa moi witotopongo de awi la'de itimisi o Yesuska witota. O nyawa una magena awi dodiao moi o Yesus iwibaja la tanu wipa'da. **32** So kagenade una iwitinga o nyawa yadadalano de awi raraga awi ngauka wosiguruto de awi kibi wosipalasa awi la'deka. **34** O dipaye womamataga so awi woma walia de wotemo, "Efata," ma ngale "Ipelenga!" **35** Kagenade awi ngau ipelenga so womasigiseka de awi la'de ipalata so aku wobicaraka. **35** De ona magenaka wasibobita, "Upa lo nisingangasu." Ngaroko wapoma komagenaduma ona foloika isibicara. **37** So o nyawa yangodu ka yohairani icarawa de yotemo, "Niakelelo! Yatotopongo lo imasigise de imomou lo ibicaraka. 'Dangodu waaaka gena ka idadi 'daloha."

### O nyawa yacala iha o Yesus wasiido

**8:1** Ma orasi magena de o nyawa yadadala o bolu moi yahino imatolomukali. To ona manga ino ihiwaka, so o Yesus awi muri-muri waaso de wotemo onaka, **2** "Kodo! Ngohi tagalusiri o nyawa yadadala ona manena. He o wange saange 'dabolo ona manena dede ngohi de o orasi manena ona manga maru ihiwaka. **3** Nakoso ngohi tosulo ona iliho de manga poko ma raba ihiwa, done ona yalumo-lumo so o ngeko ma soaka de iruba. Foloisi o nyawa ma binuka manena ma soa ikukuruno." **4** O Yesus awi muri-muri isango itemo, "Baba, o riho manena imatingatingano. De o ino kiano pamake la o nyawa yangodu manena pasio'do?" **5** De o Yesus wosano onaka, "Kagenanaga to ngini ningodu de nia maru?" De awi muri-muri itemo, "Manena naga ka o roti ngai tumudingi." **6**



Kagena de o Yesus wasulo o nyawa yadadala magena, yangodu o tonaka imagogeku. De o roti ngai tumudingi magena wa'dehe so awi sukuru watide o Gikimoie. 'Dabolo de o roti magena watepi-tepi de to una awi gia, so wahike awi muri-murika, la ona isitoku o nyawa yadadala magenaka. So awi muri-muri ona yaaka maro o kia una wasulo. **7** Kagena lo to ona de manga nao ibiuu'du ngai muruo naga. O Yesus wa'dehe o bi nao magena de awi sukuru idola o Gikimoika, de wasulo awi muri-murika so yasitokukali o bi nao magena. **8-9** Kagena de o nyawa ona magena yao'do sidago yangodu yapunuka — gena manga dala nagala yacala iha. 'Dabolo awi muri-muri wasulo so o ino ma soohu yatolomu so yamake sidago o karaja tumudingi lo iwedo. 'Dabolo de o Yesus wasulo so o nyawa yadadala magena iliho moi-moi manga dokuka. **10** So una de awi muri-muri gila-gila o deruku ipane so imajobo itagi o Dalmanuta ma tonaka.

### [O Farisika manga gogolo o Yesus waaka o nonako ihahairani](#)

**11** O Farisika yamuruo naga yahinokali o Yesuska so imatekekasango de o Yesus ma ngale o Yesus wisitura. Ona igolo o Yesuska la waaka o manara maro o nonako moi o dipaka gena igogou una wisihino o Gikimoino. **12** O Yesus womaridemo so wosango, "Ce! 'Dadoohaso o bi nyawa ma duuru o orasi manena, de yogolo ngohi taaka o nonako onaka? Toholu! Ngaroko nigolo nigegego lo ngohi taakawa o nonako maro komagena ma meta o nyawa ngini manenaka." **13** La o Yesus ona magena wadongosa de o deruku wopanekali, so womajobo kadoke o talaga ma sonongaka.

### [O Farisika de lo o Herodes manga ragi](#)

**14** O Yesus awi muri-muri imariwosa so o maru imagahowa. So ona ihawateri sababu manga deruka cawali o roti ngai moi. **15** O Yesus wotemo onaka, "Nimasitiari ma ngale o Farisika manga ragi de o Herodes awi ragi." **16** Kagena de o muri-muri imatekebicara moi de moika, de

itemo, "Una wotemo komagena sababu to ngone nanga roti ihiwa." **17** O Yesus wanako awi muri-muri manga sininga de o kia ona isibicara. So una wotemo onaka, "Ce! Ngini niasininga isusa ma ngale to ngini nia roti ihiwa. 'Dadodoohaso ngini nianako waasi de niasahe waasi sidago o orasi manena. Kodo, kiaso nia sininga 'dabongo komagena! **18** To ngini de nia lakoka duma niakelelowa, de to ngini de nia ngauka duma niisewa! Ngini niosiningawa ai nonako ihahairani. **19** Ma orasi o roti ngai motoha tatepi-tepi de o nyawa yacala motoha tahike so yao'doka. Sababu ngini masirete niatolomu so ma soohu o karaja muruo?" So ona itemo, "O karaja mogiowo de sinoto." **20** "De ma orasi moikuli ngohi o roti ngai tumudingi tatepi-tepi de tasio'doka o nyawa yacala iha. Lo kanaga ma soohu o karaja tumudingi, magena lo ngini masirete niatolomu. **21** So! Idodooha nianakowa eko niasahe waasi?"

### O Yesus o nyawa wopipilo moi wisiloha

**22** O Yesus de awi muri-muri imasidiado o Betsaidaka, de o nyawa moi wopipilo iwingaho o Yesuska. De o Yesus iwibaja la tanu o nyawa wopipilo una magena iwipa'da la womasigelelo. **23** Magena de o Yesus o nyawa wopipilo una magena iwituda so wisisupu o doku ma duduka. La o Yesus to una awi kibi wisipurai awi lakoko de awi gia wosipa'da de wisano, "Nomasigeleloka?" **24** Kagen de o nyawa magena womaginano awi simaka de wotemo, "Iya, ngohi o nyawa takelelo, duma maro ka o gota ma hutu itagi-tagiti!" **25** So o Yesus awi gia wosipa'dakali awi lakoka. So orasi magena 'dabolo de awi lako 'dalohakali so womasigeleloka, de wanako itiaika. **26** Komagena de o Yesus wosulo unaka, "Tagi noliho! De upa lo nokahikakali o doku magenaka."

### O Petrus wotemo o Yesus o Salamati ma Kolano

**27** o Yesus de awi muri-muri itagi o Kaisarea Filipi ma soa de ma dokuka. Itagi so manga dodagi ma rabaka o Yesus wasano onaka, "Niise o nyawa isibicara, naguuna ngohi manena?" **28** De ona isango itemo, "O Yohanes

Wooosi, de ma binukali itemo o Elia, de o nyawa ma somoali itemo ngona o nabi moi." **29** So kagena de o Yesus wosano onaka, "Duma nako ngini masirete ngohi manena naguuna?" O Petrus wotemo, "Baba, ngona manena o Salamati ma Kolano, kiaka o Gikimoi wihirika de awi hino itekaka o Yahudika yododamaha." **30** La komagena de o Yesus wasibobita onaka, "Ma ngale ngohi gena upa lo nisingangasu o bi nyawa moika."

## O Yesus wodedemo awi sangisara de awi sone

**31** 'Dabolo de o Yesus womadedemo awi muri-murika ena gena: "Ngohi manena, o Nyawa ma Duhutu, done o Yahudika manga roriri, o imamka ma bi sahe, de o bi guru agama ona imahara ma dorou. So asa isisangisara 'dasiri ma bati itooma de isosone, ngaroko komagena iaka duma o wange saangeka de ngohi toohokali." **32** Awi sangisara de awi sone ma ngeko gena o Yesus awi muri-murika wosingangasu wositotiaika. La o Petrus woise de o Yesus awi giaka walia la imatinga gila-gila wisidapano wotemo, "Baba Guru, tanu o Gikimoi wonisiraro la upa idadi komagena." **33** Duma o Yesus womakiliho de wakeri-keri awi muri-murika de o Petruska wisidapano wotemo, "He Toka ma Kolano, nolo'da! Ani sininga magena imaterowa de o Gikimoi awi sininga, duma ani sininga gena ka o nyawa ma sininga!" **34** De asa o Yesus o nyawa yadadala dede awi muri-muri watolomuno so wasibicara onaka, "O nyawa nagoona la imote ngohi, bilasu imahadoku so o moi-moi manga sininga ma rabaka ya'dohaka la imote-mote ngohi, de ya'dohawa nakoso o sangisara ma sangahadi yamoku ma bati yosone. **35** Sababu o nyawa nagoona la manga rohe isiboso, ona magena done isoneka de asa yaumo o uku itatatuwa o sangisara ma 'dokuka. Duma o nyawa nagoona manga oho ma salamati isisa ma ngale ngohi de o Gikimoi awi habari 'daloloha, done isone duma asa ioho o Gikimoi awi simaka. **36** Ngaroko o nyawa moi wotemo o dunia de ma raba manena ka to una, duma 'dangodu magena ma faida ihiwa, nakoso ma duuru una o uku isosora ma rabaku wiumo. **37** Sababu o oho ikokakali gena pamakewa de o guraci de o salaka positagali, eko lo

akuwa paija de o pipi. **38** Ma orasi manena o dunia iwedoka de o dorou so o Gikimoi iwidongosaka. So upa o nyawa yama'de isihakawaro ma ngale ngohi de ai dodoto. Sababu nagoona yama'de isihakawaro ona magenaka ngohi o Nyawa ma Duhutu lo asa ona tanako taholu ma orasi ngohi tahinokali o duniaku dede o Gikimoi awi mulia de o bi malaikat 'datetebi."

**9:1** De o Yesus wotemoli, "Niososininga, yamuruo naga to ngini nia sidongirabano done isone waasi, nakoso yakelelo waasi o Gikimoi awi pareta 'dapoputuru."

## O Yesus wisimulia

**2** O wange butanga ipasaka de o Yesus wangaho awi muri yaruwange ena gena o Petrus de o Yakobus de o Yohanes, itagi imatinga o tala ikukuruye moika. To ona manga goginano ma rabaka o Yesus awi jamani ingali, **3** awi baju idadi 'daare de isiru -- pamakewa papoka de 'datebi maro komagena. **4** Kagen a de awi muri yaruwange iwimomote gena yakelelo o Yesus de o Elia de o Musa imatekebobicara. **5** So o Petrus wotemo o Yesuska, "Baba Guru, 'daloha bai ngone lo ngo kanena, so o dadaru ngai saange miaaka, ngai moi to ngona, ngai moi to Musa, de ngai moi to Elia." **6** Patotiai gena o Petrus wanakowa o kia bilasu una wosibicara sababu una de awi dodiao yasinoto o modo ma rabaka. **7** Kagen a de o lobi-lobi o bolu moi iuti so yasaoka de o lobi-lobi ma rabano o ili moi iise itemo, "Una manena to ngohi ai ngopa towidododara ka una bilasu niwisigise!" **8** Manga lako yatawi so ato imatodoka so yanano o nyawa yasinoto magena lo yahiwaka cawali o Yesus womatengoka. **9** So ma orasi ona iuti o talaku de wasibobita onaka, wotemo, "Upa lo ngini nisingangasu o nyawaka, o kia ngini niakokeleloka ma bati ngohi, o Nyawa ma Duhutu, tomomi ai sone ma rabano." **10** La o Yesus awi muri-muri yacoho to una awi beseso magena, duma ona masirete manga sidongirabaka isibicara itemo, "To una awi demo 'wosoneka so wipoosuka de woohokali' ena gena ma ngale o kia?" **11** Mutuwade ona o Yesuska yosano itemo, "Dadoohaso o bi guru agama yodedemo gena o Salamati ma Kolano iwihiwasi de bilasu o Elia

wahino wo'domano?" **12** So o Yesus wasango wotemo, "Magena itero, o Elia gena igogou wahino wo'domano ma ngale wosidailako de o bi moi-moi wosidiahi. Duma o kiali o buku ma rabaka isilefo gena done o Nyawa ma Duhutu magena awi sangisara 'datubuso de lo o nyawa yadadala asa wiholu. **13** Duma ngohi totemo nginika, o nyawa imatero koloko o Elia gena womasidiadoka to ngini nia sidongirabaka, de o nyawa to ona manga sininga ma dupa yamote so wisisangisara. Magena itero de itiaika maro o kia isilelefo o buku ma rabaka idodooha o Yohanes Woosi to una awi oho ma ngeko."

### O Yesus wisiloha o ngopa moi o toka wingongosa

**14** Ma orasi o Yesus de awi muri yaruwange ikahinokali de yakelelo o nyawa yadadala yasigilolino awi muri-muri ma somoali de o guru agama yamuruo naga imatekeributu. **15** So o nyawa yadadala o Yesus wikelelo de ona yatodoka, de imagogora o Yesus wisibubusu. **16** Kagen a de o Yesus wosano o bi guru agama magenaka, "O kiali ngini nioributu?" **17** Magena de o nyawa yadadala manga sidongirabano o nyawa moi wahino wosango, "Baba Guru, ngohi ai ngopa towingaho ngonaka. Una manena wimumusu de awi ill ihiwa sababu o toka wingosaka. **18** Nakoso o toka iwingosa de awi rohe wosipapaka o tonaku de awi uruno lo o geko isupu, awi ingi irita de awi rohe lo iiraka. So ngohi togolo ani muri-murika la yodusu o toka magena, duma ona yaakuwa." **19** So kagen a de o Yesus wotemo onaka, "Idodooha ngini manena! Igogou-gogou ngini manena o nyawa nia piricaya ihiwa. Sidago o orasi ma muruosi ngohi togoge dede ngini de tinisisabari nginika? Nako komagen a o ngopa magena niwingahono kanena!" **20** De ona o ngopa magena iwingaho o Yesuska. La o toka magena o Yesus wikelelo, de o ngopa una magena wiaka so awi rohe wosipapaka o tonaku de womalololo de awi rohe lo iiraka de awi uru lo igekoka. **21** La o Yesus wosano ma babaka, "He itekaka to una awi siri manena?" De ma baba wosango, "Ka wicecekesi. **22** So he ma para ma muruo naga o toka magena tanu witooma, so o uku ma rabaku wiuumo komagen a lo o ake ma rabaku. So nakoso 'daloha, Baba, de tanu

nowiriwo. Kodo, Baba! Noraigalusiri la nako ngona ka aku de nomiriwo ngomi!" **23** Kagen a de o Yesus wosango wotemo, "Iya, nako ngona masirete ka naaku nongaku! 'Dangodu asa o Gikimoi waaka hitilahi ngona nowipiricaya." **24** Gila-gila ma baba una womatoore, "Suba Jou, ngo hi towingaku. Duma kodo! Ai piricaya ka ma cunu. So tanu noiriwo la ai piricaya nodogo la idadi 'daputuru!" **25** Orasi magena de o Yesus wakelelo o nyawa yadadala yahino iwisidolomu de una wosulo o toka magenaka wotemo, "He, toka wisitotopongo de wisimumusu, ngo hi tonisulo nosupu o ngopa manenano de upa lo nokahinoli!" **26** O toka magena imatoore de o ngopa awi rohe magena iira de ifoloi witrinekali de gila-gila o toka magena isupu o ngopa magenano. So o ngopa una magena koloko wosoneka sidago o nyawa yangodu itemo, "Una magena wosoneka!" **27** Duma o Yesus wotagi awi giaka wacoho de wilia wisimomi de gila-gila o ngopa magena una womaokoka. **28** 'Dabolo de o Yesus o tahu moika womatingaka de awi muri-muri yahika so imasano, "Kiaso ngomi manena o toka gena miodusu miaakuwa?" **29** De o Yesus wosango wotemo, "O toka gena podusu paakuwa cawali ka pomania o Gikimoika. O ngeko ma somoali gena ihiwa." **30** Kagen a de o Yesus de awi muri-muri imajobokali.

### O Yesus awi sone ma ngeko wodedemo

So itagi o Galilea ma tonaka duma o Yesus woholu la upa lo o nyawa winako kiaka wogoge, **31** sababu to una awi muri-muri wadotosi. De una wotemo gena komanena: "Ngo hi manena, o Nyawa ma Duhutu, done asa isidoa ai sature manga gia ma sohaka so ngo hi asa itooma, duma o wange saangeka de asa ngo hi toohokali." **32** Magena de o Yesus awi demo de awi simodoto ma ngale gena ona yanakowa, duma ona yamodo de yododato imasano unaka.

### Naguuna ifoloi wolamo

**33** O Yesus de awi muri-muri imasidiado o Kapernaum ma dokuka so

imasidodogu o tahu moika, de wasano awi muri-murika, "Kangano o kia nimatekesikokoholu ma orasi o dodagi ma rabaka?" **34** Duma ona yama'de so imapopongoka, sababu o dodagi ma rabaka ona imatekesikakoholu ma ngale nagoona foloi ilamo to ona manga sidongirabaka. **35** So de o Yesus womatamiye de watolomu so wisigilolino de wotemo onaka, "O nyawa naguuna womau wolamo da o nyawa ma somoa, una magena bilasu womahadoku de wodupa wariwo o nyawa yangoduka." **36** 'Dabolo de o Yesus o ngopa wiceceke moi wingahono so wisigokono to ona manga simaka. Gila-gila o ngopa magena witide de witoti de wotemo awi muri-murika, **37** "O nyawa nagoona manga siboso o ngopa manenaka sababu imote ngohi, magena imatero de ona lo ngohi isiboso. So o nyawa nagoona la isiboso ngohi, ona manga siboso ma manara magena lo ma meta ai babaka sababu ngohi una woisulo."

### Nagoona nanga dodiao de nanga satoru

**38** De o Yohanes wotemo o Yesuska, "Baba Guru, ngomi miwikelelo o nyawa moi o toka wodusu de to ngona ani ronga bai, Baba. So ngomi miwisimahawa, sababu una to ngomi mia dodiaowa." **39** Duma o Yesus wotemo, "Upa niwisimahawa una magena, sababu o nyawa moi lo yahiwa o nonako ihahairani waaka de to ngohi ai ronga gila-gila womabulutu de ai ronga ma dorou wogaka. **40** Sababu o nyawa inasasaturuwa, ona magena to ngone nanga dodiao. **41** Igogou 'daloha, o nyawa nagoona yodupa ngini iniriwo so o ake inisiudoka sababu ngini to ngohi ai dodiao, done ona magena yamake manga fanggali o Gikimoino.

### O siminiko upa sidago o nyawa o dorou yaaka

**42** "O nyawa wiceceke moi to ngini nia sidongirabano nagoona o sababu moi yaaka so ngohi he ipiricayakawa, lebelaha o teto ilalamo-lamo moi manga toloka posidopilikuka de o teoku palutuka. **43** Nakoso de ani gia la ngona o dorouku notura hika la ani gia ma sononga magena nabitoguka!

Lebelaha ngona nooho dede o Gikimoi de ani gia ka ma sononga, upa sidago de ani gia ngai sinoto de ngona o sangisara ma 'dokuka asa niumo, ena gena o uku ma sora ikokakalika. **44** Kagen a o uku itatatuwa, de o gai lo asa isonewa. **45** Nakoso de ani 'dohu la ngona o dorouku notura, hika la ani 'dohu magena nabitoguka! Lebelaha ngona nooho dede o Gikimoi de ani 'dohu ka ma sononga, upa sidago de ani 'dohu ngai sinoto de ngona o sangisara ma 'dokuka asa niumo. **46** Kagen a o uku itatatuwa, de o gai lo asa isonewa. **47** Nakoso de ani lako la ngona o dorouku notura, hika la ani lako ma gomo magena napeleuka! Lebelaha ngona nooho dede o Gikimoi awi pareta ma rabaka de ani lako ka ma sononga, upa sidago de ani lako ngai sinoto de ngona o sangisara ma 'dokuka asa niumo. **48** Kagen a o uku itatatuwa, de o gai lo asa isonewa. **49** O nyawa isigeto asa manga dorou isitebi de o uku ma sahu, imatero koloko o gaso o duba ma lake isitebi de o gasi la o Gikimoi wodupa. **50** To ngini nia oho imatero de o gasi, so nakoso o gasi magena 'dahaoka, done de o kia posiaka la aku 'damirikali? Togolo! Tanu ngini gena upa nimatekesikokoholu, duma nidadi maro o gasi 'daloloha la o nyawa nidupa de nia oho ma rabaka gena ka cawali o rimoi de o sohi."

## O Yesus awi dodoto ma ngale o ngongolu

**10:1** 'Dabolo de o Yesus o riho magena wodongosa so wotagi o Yordan ma sonongaka o Yudea ma tonaka. O bi nyawa yadadala yahino o Yesus widolomunoli. Kagen a de o Yesus wadotokali ona magena maro to una awi manara. **2** O Farisika ma nyawa yamuruo naga yahinokali de manga edekati o Yesus awi sala yasari so itemo, "Mote nanga agama ma bobita aku o nyawa manga pe'deka yaholu?" **3** Kagen a de o Yesus wosango, "O Musa o bobita winihike nginika gena idodooha?" **4** De ona yosango, "O Musa womisimaha ngomi aku miaholu to ngomi mia pe'deka, hitilahi ngomi o ngongolu ma surati miakakasi." **5** De o Yesus wasitemo onaka, "Sababu to ngini nia sininga 'datogoi sidago o Musa o bobitaka wosilefo. **6** Duma ma solano, ma orasi o Gikimoi o nyawa waaka gena o Gikimoi awi demo ma rabaka itemo, 'O Gikimoi waaka o nyawa yanau de o



ngope'deka. **7** Ma sababu magegena yanau bilasu ma baba de ma awa yadongosa de imarimoi de manga pe'deka, la idadi ka ka moi, **8** so ona magena yasinotokawa duma ka ka moi.' **9** Ma ngale magegena so o kia o Gikimoi wasirimoika upa lo o nyawa pasiritinga." **10** 'Daboloka de o Yesus o tahuka wowosa de awi muri-muri wimote la yosano o kia una wosibobicaraka gena. **11** O Yesus wotemo onaka, "Naguuna ma pe'deka womiholuka de wokawi de o ngope'deka ma somoali, una magena wosundali ma ngale ma pe'deka ma nonomaka. **12** Komagena lo o ngopedeka moi ma roka mowiholuka de mokawi de yanau ma somoali, muna magena mosundali ma roka ma nonomaka."

### O Yesus o ngopa wasibarakati

**13** O wange moiku o bi nyawa manga ngopa o Yesuska yaaho la wapa'da de wasibarakati, duma awi muri-muri yatoosa so yadogore, "Upa niahika!" **14** Ma orasi o Yesus wakelelo o hali magena, una wongamo de wotemo onaka, "Nia'dohaka la o bi ngopa magena yahino ngohino, upa lo niafati de io niasimahawa, sababu o bi nyawa imatero maro o ngopa magena asa yaaku iwosa o Gikimoi awi paretaka. **15** Igogou-gogou totemo nginike, o nyawa moi lo waakuwa wamake o Gikimoi wipareta nakoso una magena woholu o Gikimoi una wipareta maro ka o ngopa moi." **16** Kagen de una o bi ngopa magena watoti de awi gia wosipa'da manga sabiku so wasibarakati.

### O nyawa wokakaya moi

**17** Ma orasi o Yesus awi dodagi wadofakali de o nyawa moi widogogora unaka. De o nyawa una magena wobukuku de wosuba o Yesuska de womasano, "Baba Guru, ani sininga 'daloloha, ngohi bilasu o kia taaka la tamake o oho ikokakali?" **18** 'Dadoohaso ngona notemo ngohi ai sininga 'daloha? Kanena moiwa manga sininga 'daloloha, cawali o Gikimoi masirete. **19** Ngona nanakoka o Gikimoi awi bobita: 'Upa ngona notooma, upa ngona nosundali, upa ngona notosi, upa nitodamoto ani dodiaoka, upa

nosidarafa de lo nahoromati ani baba de ani awa." **20** De una wosango wotemo, "Baba Guru, o bobita 'dangodu magena tamoteka ma orasi ngohi ka togogohiduursi." **21** O Yesus iwitailako o nyawa una magena de wigalusiri so wotemo, "Cawali o ngai moisi naaka waasi. Notagi la ani rongga moi ani tahu ma rabaka nosiija de ma pipi o nyawa isususaka nasitoku, la ngona asa namake o arata ma duhutu o sorogaka. 'Daboloka de nahino, la noimote ngohi." **22** Woise o Yesus wotemo komagena, so kagena de o nyawa una magena awi sininga itura, so wotagi o riho magena wodongosa de awi sininga ipeleso sababu una magena wokakaya moi. **23** La o Yesus womaginano awi muri-murika de wotemo onaka, "Isusa icarawa o nyawa ikakaya iwosa o Gikimoi awi pareta ma rabaka!" **24** Awi muri-muri asa yohairani o Yesus awi demo magena. Duma una wosidadu wotemo onaka, "Ai ngopa-ngopa, igogou isusa o nyawa asa iwosa o Gikimoi awi paretaka! **25** Lebelaha o unta moi asa iwosa o yaiti ma kupeka nako positetero o nyawa wokakaya moi wowosa o Gikimoi awi pareta ma rabaka." **26** O Yesus awi demo magena awi muri-muri foloi yohairani, sidago imatekebicara moi de moika, "Nako igogou komagena, done nagoona asa aku iwosa o salamatika?" **27** O Yesus wakeri-keri de wotemo, "Nakoso maha de o nyawa manga manara o duniaka gena idadiwa, duma nakoso maha de o Gikimoi awi manara asa idadi sababu 'dangodu magena aku una waaka. **28** De o Petrus wotemo, "He! Ngomi manena mia moi-moi lo 'dangodu miodongosaka so minimoteka, Baba, so o kia asa miamake?" **29** O Yesus wotemo, "Igogou, o nyawa nagoona manga tahu yodongosaka, eko manga gianongoru de manga awabira, eko manga awa de manga baba, eko manga ngopa-ngopa, eko lo manga doro sababu ma ngale ngohi de o habari 'daloloha o Gikimoino, **30** ona magena asa yamake foloi idala o orasi manena. Ona asa yamake ma giliho sidago ma para o ratu moi to ona manga tahu, manga gianongoru, manga awabira, manga awa, manga ngopa-ngopa, manga doro de o moi-moi o duniaka, de komagena lo o sangisara. De ma orasi ma simaka asa o nyawa ona magena yamake ma fanggali o oho 'daloloha de ikokakali. **31** Duma igogou, done o nyawa yadala o orasi manena isi'do'doma done asa itotuuru, so o orasi manena o nyawa yadala ibitototuuru done asa

isi'do'domakali.

## Ma para ma saangeka o Yesus wodedemo awi sone ma ngeko

**32** 'Dabolo de o Yesus de awi muri-muri manga dodagi yadofakali so ikahie o doku Yerusalemye. O Yesus wotagi wo'do'doma, awi muri-muri yototuuru de yamalo manga rohe 'datora. De o nyawa yadadala imomote gena yamalo yamodo. Kagen a de o Yesus de awi muri-muri imatingaka so womasingangasu onaka done o kia asa idadi una masireteka. **33** So o Yesus wotemo onaka, "Niise la nianako. Ngone manena pokahie nanga meta o Yerusalem ma dokuka. So kagen a pahika de ai orasi yaadoka o Nyawa ma Duhutu ngo hi manena asa isidoa to ngo hi ai saturuka ena gena o imam ma bi saheka de o bi guru agamaka, la isitatapu ngo hi manena bilasu isosone. 'Dabolo de asa isidoakali o nyawa o Gikimoi winanakowa ona magena o bi nyawa o aheli ma somoaka. **34** La ona magena igagaka isi ihe de ihobi de ingangapo de lo itooma. Duma o wange saangeka de ngo hi asa toohokali."

## O Yakobus de o Yohanes manga gogolo

**35** 'Dabolo de o Zebedeus awi ngopa-ngopa, o Yakobus de o Yohanes, yahino o Yesuska de itemo, "Baba Guru, nako yaaku de o kia naga moi mi odudupa mimagolo ngonaka la tanu nomihike ngomika." **36** De o Yesus wosano, "O kia ni adupa ngo hi tinihike nginika?" **37** De ona yosango, "Ngomi mi adupa nakoso ma orasi nopareta nimulia ma rabaka de mimatami moi ani girinaka de moi ani gubalika la ngone popareta." **38** Kagen a de o Yesus wotemo onaka, "Igogou! Ngini nianakowa o kia ni agogolo gena. Sababu nako nimode komagen a, bilasu nimode niaudo o sangisara de o sone ma udo-udo maro ngo hi tauudo de lo nisimomoku o sangisara de o sone ma sasaru maro ngo hi isimomoku gena. So tinisango nginika, ka niaaku?" **39** De ona yosango itemo, "Ngomi ka miaaku." Mutuwade o Yesus wotemokali onaka, "Igogou! Ngini lo done asa niaudo ma udo-udo maro o kia ngo hi asa tauudo gena, de lo nimomoku maro o

kia ngohi asa tamomoku gena. **40** Duma ma ngale nagoona asa imatami ai girinaka eko ai gubalika, magena ngohi ai hakuwa so tositatapuwa. Magena maha de o Gikimoi sababu ka una wanako de wositatapuka nagoona asa imatami o riho magegenaka." **41** Ma orasi awi muri yamogiowo yoise manga gogolo komagenana, de ona yatoosa so o Yakobus de o Yohanes yangamo. **42** So o Yesus watolomu yangodu so yahino unaka de wotemo, "Ngini ningodu nianako o bobareta o dunia manena ma 'dokuka manga kawasa yasidipito so manga oho isangisara. De o bobareta yalalago gena asa yapoloso so manga oho itibalangu. **43** Duma ngini upa komagenana! So bilasu komanena; naguuna womau wolamo to ngini nia sidongirabano una magena bilasu wodadi to ngini nia gilalo. **44** De naguuna womau wo'do'doma to ngini nia sidongirabano, una magena wogilalo ma ngale ngini ningoduka. **45** Mutuwade ngohi, o Nyawa ma Duhutu lo, tahino la ma ngale ngohi ileleani gena hiwa, duma ngohi tahino ma ngale o nyawa taleleani. Komagenana lo ai oho tahike ma ngale o nyawa yadadala isalamati."

### Wopipilo o Bartimeus o Yesus wisilohaka

**46** De o Yesus o Yerikhoka womasidiado. So o orasi magena 'dabolo de o Yesus de awi muri-muri de o nyawa yadadala o doku magena yodongosa so itagi yahika o doku ma ngoguka de kagenana naga o nyawa moi wopipilo awi rongana o Bartimeus gena o Timeus ma ngopa una magena o ngeko ma dateka wogogeku de wogogolo. **47** Orasi magena una wogiise o Yesus o Nasaret ma nyawa nogena wakahino, so una womatoore, "Ya Yesus, o Salamati ma Kolano! Kodo, noigalusiri ngohi!" **48** De o nyawa yadadala iwingamo una itemo, "Nomapopongo!" Duma una ifoloi womatotoore, "Suba Jou! O Salamati ma Kolano! Kodo, noigalusiri ngohi!" **49** Kagenana de o Yesus womatogu de wotemo, "Tagi la niwiaso una magena." So ona iwiaso o nyawa wopipilo de itemo, "Nomarihi-rihi! To ngona ani ukuru ma loha sidago o Yesus woniaso, so nomaoko la notagi!" **50** Kagenana de o nyawa wopipilo magena awi baju wosipaka de tai-tai womaoko so wotagi o Yesuska. **51** O Yesus wisano o nyawa wopipiloka, "O kia nodupa ngohi

taaka ngonaka?" De o nyawa wopipilo wosango wotemo, "Baba Guru, ngohi todupa tomasigelelo." **52** Kagen a de o Yesus wotemo, "Notagi, sababu de to ngona ani piricaya ngohika, asa nisilohaka." O orasi magena 'dabolo wopipilo asa womasigeleloka de o ngekoka wotagi o Yesus iwimote-mote.

## O Yesus o Yerusalemka wowosa

**11:1** Ma orasi o Yerusalem yadumuka so ona imasidiado o doku Betfage de o Betania o tala Zaitun ma ngunuka. Kagen a de o muri yasinoto wasulo itagi i'doma. **2** De o Yesus wotemo, "Nitagi o doku magenaka! Kagen a niwosa o dokuka de ngini asa niakelelo o keledai ma goho moi yapilikuka. De o nyawa moi lo waasi o keledai magena yobane. Ma bobiliku niasose de niaaho noaena. **3** Kakoso o nyawa nisano nginika, "Dadoohaso o keledai magena nia'dehe?", de nitemo onaka, 'O Jou wodupa wapake so 'dabolo de asa wosikahinokali.'" **4** O Yesus awi muri yasinoto magena itagi, de ona asa yamake o keledai ma ngopa yapilikuka manga tahu ma simaka de o ngeko ma dateka. So ona yasose o keledai ma bobiliku magena. **5** La o nyawa yamuruo naga imaooko yakelelo de yasano onaka, "He, ngini magena nidooha? 'Dadoohaso o keledai ma bobiliku niasose de nia'dehe?'" **6** De o muri yasinoto yasango, maro o kia o Yesus wotetemo onaka. La o nyawa ona magena ya'dohaka so o keledai magena yaahoka. **7** So ona o Yesuska imasidiado de manga juba yahoi so isinaho o keledai ma duduku. Kagen a de o Yesus wodola so womatamiye ma 'dokuka. **8** O nyawa yadadala manga juba isinaho o ngekoko de ma binukali o gota ma daara de ma sosokaka manga doroka ya'dehe so o ngekoko isihaja. **9** O bi nyawa yadadala i'do'doma de ma binukali itotuuru o Yesus wimote-mote de yangodu imasagaga itemo, "Gikimoi powigiliri! Una wisibarakati so wahino de o Jou awi rong a. **10** Awi pareta Imasidiadoka de ifero imatero maro to ngone nanga ete ma Kolano Daud! Hino powigiliri o Gikimoi Wikukuruye!" **11** Komagen a imaaka sidago o Yesus womasidiado o Yerusalentka, gila-gila wowosa o Gikimoi awi Tahu ma lolohaka. Kagen a una watailako ma moi-moi ma rabaka 'dangodu, duma he 'dama'da-ma'da

so o orasi magena una de awi muri yamogiowo de sinoto itagi imakangaho o Betania ma dokuka.

### O Yesus de o ara ma hutu

**12** Ma goginitano ma orasi ona o Betania ma dokuno isupu. So yahika ma soaka de o Yesus wamalo wisapi. **13** Ma soa ma gursi de una wakeleloka o ara hutu moi de ma soka irubu. Kagenade o Yesus wotagi so watailako o ara ma hutu magena nagala de ma sopoka. Duma waado de ma sopo ka o ngai moi lo ihiwa so ka cawali ma soka irubu, sababu o bi ara ma hutu ma orasi isopo waasi. **14** So kagenade o Yesus wabicara o ara ma hutu magenaka wotemo, "O orasi manena bato done o nyawa moi lo yao'dokawa to ngona ani sopo!" De awi muri-muri lo yoise o kia wotetemo gena.

### O Yesus wotagi o Gikimoi awi Tahuka

**15** Bolo de ona imasidiado o Yerusalemka, so o Yesus wotagili o Gikimoi awi Tahu ma lolohaka wasitodadaheno, o nyawa yadala kagenadahu imasiiija de imatekekokiija. Ma binuka o nyawa o doku ma somoano manga pipi imatekesitagali de ma binukali o namo dara imasiiija yaaka manga gaso. So o Yesus witoosa, de gila-gila una wadusu de manga meja waeha de lo manga bako wosipapaka 'dabolo de wosibobita wotemo, **16** "Ma solano o orasi kangano manena de ikahika o nyawa manga manara maro komagegena yaakukawa yaaho nonena o Gikimoi awi Tahu ma lolohano!" **17** 'Dabolo de o Yesus o nyawa kagenadahu wadoto. So wotemo onaka, "O buku ma rabaka isilelefo o Gikimoi wotemo komanena; 'To ngohi ai tahu manena idadi manga riho moi, o bi nyawa o dunia ma pupuku ihaka, kanena imania.' De 'dadoohaso ngini niaaka ikokokoora de ifoforiki manga dodutulu ma riho!" **18** O imamka ma bi sahe de o bi guru agama yoise awi demo magena so o ngeko isisari la o Yesus witago de witooma. Ona magena wimodo unaka sababu o nyawa yadadala iwidupa ma orasi yoise to una awi dodoto. **19** So ma orasi he

'daputu o Yesus de awi muri-muri imasihoika o kota magenano.

## O ara ma hutu ma simodoto

**20** Ma goginitano de ka ilangi-langisi de ona yotagi yakahika yatilaku o ara ma hutu magenaka, de ona yakelelo o ara ma hutu magena isoneka sidago ma ngutuku. **21** La o Petrus womasininga o wange ipapasaka o hali magena asa idadika. So o Petrus wotemo o Yesuska, "Baba Guru, hika nanano. O ara ma hutu nosilalahi gena isoneka!" **22** O Yesus wosango, "O Gikimoika niwipiricaya! **23** Sababu nakoso ni dodatowa de niopiricaya o kia nitetemo igogou asa idadi, ngini asa nitemo, 'He, tala! Nomatide de nomatuluru la o teoku nilutuka!' Done asa o Gikimoi wasituluru. **24** So tinidedemo nginika o kia bato nimaniamania de nimagolo bilasu niopiricaya igogou o Gikimoi winihike 'daboloka, de asa niamake maro o kia nigolo unaka. **25** De lo nakoso ngini nimaniamania duma nia sininga isanangiwa de o nyawa ma somoa, nitagi la nimasiloloakasi. La ma ngale o Baba o Gikimoi o soroga ma rabaka lo asa winisiapongu to ngini nia dosa de nia sala moi-moi. **26** Duma nakoso ngini nimasiloloa niholu dede o nyawa ma somoaka, done o Baba o sorogaka lo winisiapongowa to ngini nia dosa."

## O sosano ma ngale o Yesus awi kuasa

**27** O Yesus de awi muri-muri imasidiadokali o kota Yerusalemka. So o Gikimoi awi Tahu lolohaka wotagi wakokiloli de o imamka ma bi sahe de o bi guru agama de lo o Yahudika manga roriri yahino o Yesuska. **28** De ona wisano unaka, "Naguuna wonisulo de naguuna o haku wonihike ngonaka so kagunugo naaka komagena?" **29** De o Yesus wosango wotemo, "Ngohi lo tinisanokasi, la nako ngini niasangoka de asa ngohi tinidedemo nginika de naguuna o haku woihike so taaka o moi-moi manena. **30** So hika ngini niasango, o Yohanes o nyawa waosi gena naguuna o haku wihike, o nyawano eko o Gikimoino?" **31** Kagenamania de ona masirete imatekebicara moi de moika itemo, "Nakoso ngone potemo o haku o Gikimoino, done una wonasitemo, "Dadoohaso o Yohanes Wooosi

niwingakuwa?' **32** Duma isusali nako potemo de o haku o nyawano." (Ona yamodo poli upa sidago o nyawa yadadala yotoosa, sababu ona yangaku o Yohanes una magena o nabi moi.) **33** So cawali isango itemo, "Ngomi mianakowa kiano una o haku magena wamake." So kagen a de o Yesu s wotemo onaka, "Nakoso komagena, ngo hi lo toholu todedemo nginika de naguuna awi haku so ngo hi taaka o moi-mbi 'dangodu manena."

## O ade-ade ma ngale o anggur ma doroka yomomanara

**12:1** So komagena 'dabolo de o Yesu s wobicara o imam ma bi sahe de o bi guru agama de lo o Yahudi manga roririka de to una awi ade-ade wotemo onaka, "Kanaga o nyawa moi awi doroka o anggur wosidato, de ma batino o pagari wosigilolika. 'Dabolo de una o busune wopuawe waaka o anggur ma dedeho. Kagen a lo o falagaku ikukuruye moi wosigoko idadi o dor o ma jojaga ma riho. 'Dabolo 'dangoduka de o anggur ma dor o magena wosisewaka o nyawa yamuruo naga yomomanaraka, kagen a de una womajoboka o doku ma somoaka. **2** Ma orasi imasidiado o anggur ma sopo yautu, o nyawa una magena wosidingo awi nyawa wogogilalo moi kadoka yomomanara to una awi doroka, ma ngale wa'dehe to una awi dor o ma gimina. **3** Duma ona witago wogogilalo una magena. 'Dabolo de ona wingangapo so wisulo una woliho ka womamuruoye. **4** La o dor o ma duhutu una magena wosidingokali wogogilalo moili. Duma yomomanara ona magena wingangapokali wogogilalo una magena awi saheku, gila-gila witotadi de widodoa. **5** O dor o ma duhutu una magena wosidingokali o nyawa wogogilalo ma somoali, duma ona wogogilalo magena witoomaka. So komagena ona yaaka igogilalo ma somoali de ka yadala, ma binuka yangangapo de ma binukali yatoomaka. **6** O dor o ma duhutu magena nagoonali asa wasidingokali awi doroka itagi? Cawali womatengokasi ena gena awi ngopa masirete wodododara. So ma dodoguka de una wisidingo ma ngopa magena kadoka yomomanaraka magena. De awi sininga ma rabaka itemo, 'Igogou, done ai ngopa asa iwihoromati.' **7** Duma imomanara ona magena wikelelo de itemo moi de moika, 'Una manena o warisi ma jojoho. Hino la ngone una powitoomaka, ma ngale ngone



pamake to una awi warisi!" **8** Kagen a de o ngopa magena witago so witoomaka. De lo awi bake magena ona yaumo o dor o ma duduka." **9** So kagen a de o Yesu s wasano, "O kia asa waaka o dor o ma duhutu magena? Bilasu una wahino de watooma o bi nyawa imomanara ona magena de gila-gila o dor o magena wosisewakali o nyawa imomanara ma sosoaka. **10** Ngini ningodu lo niabaca 'dabolo de niawosaka o gimina manena o Gikimoi awi buku ma rabaka, 'O teto o tukang yahoholu de yapapakewa magena done asa isiaka de idadi o tahu ma soso'de ma teto ma nonoma. **11** Magena o Gikimoi awi manara igogou de ka 'daloha poli.'" **12** Komagen a de o Yahudika manga roriri yoise o ade-ade magena de ona imasikadailako la tanu o Yesu s iwitago, sababu ona yanako o ade-ade magena o Yesu s wasimeta onaka. Duma ona yamodo ma ngale o bi nyawa yadadala, so ona itagi de o Yesu s ka wi'dohaka.

### Ma ngale o balastengi pofangu ma Kaisarka

**13** 'Dabolo de o Yahudika manga roriri manga akal ma dorou o Yesuska so o Farisika de o Herodes awi nyawa yasulo itagi la o Yesu s iwisabatolo de o sosano moi. **14** So ona magena yahino de itemo unaka, "Baba Guru, ngomi mininako ngona o nyawa nololoa moi, de ngona namodowa nagoona bato. Ngaroko ona magena o nyawa yalalago, ngona de ani sininga igogou nasidoto maro o kia o Gikimoi awi dupa bilasu paaka. Hika nomisingangasu, ka 'daloha o balastengi pofangu ma Kolano Wilalamo ma Kaisarka, eko upa? Bilasu ngomi mifangu eko upa?" **15** Duma o Yesu s wanako to ona manga damatoko so wotemo ona magenaka, "'Dadoohaso ngohi nisabatolo? Hika niaahono o pipi ngai moi la ngohi tanano.'" **16** Kagen a de o pipi moi yaaho so yahike unaka. Bolo de una wasano onaka, "Ma dulada de ma lefo to naguuna manena?" De ona yosango itemo, "To ma Kaisar awi dulada de awi lefo." **17** Kagen a de o Yesu s wotemo, "So o kia naga la ma sihino ma Kaisar waaka bilasu niahike ma Kaisarka, de nia sininga de nia gogoho niahike o Gikimoika sababu o nyawa ma sihino gena o Gikimoi waaka." Magena de to una awi demo magena yoise 'dabolo de ona yangodu yohairani sababu igogou to una awi pade de awi

cawaro ifoloi poli.

## O sosano ma ngale posoneka de poohokali

**18** O Sadukika ma nyawa, ona magena yongakuwa o dodoto maro o nyawa isoneka de asa iohokali, ona magena yamuruo naga yahino manga edekati o dodoto magena isiceke so wisano unaka de itemo komanena, **19** "Baba Guru, o Musa awi bobitaka asa isilefo ma ngale ngone inangoduka gena, 'Nakoso yanau moi la wosone de o ngopa wamake waasi bilasu ma nongoruku asa womikawikali ma ria ma balo muna magena la o ngopa yamake de o ngopa magena wisikagena imatero de ka ma ria wosone awi buo.' **20** Kanaga idadika ona magena o gianongoru yatumudingika. Woriria wokawi 'dabolo duma awi ngopa ihiwasi de wosoneka. **21** Bolo de ma nongoruku womikawikali ma ria ma balo magena, duma o ngopa yamake waasi de wosonekali. Komagena idadi de imaaka imakoketero sidago ma nongoru yaruange, **22** de itagi gila-gila sidago ma bati awi gianongoru yatumudingi ma kawii ma mata-mataka. De ma dodoguku o ngope'deka muna magena lo mosoneka. **23** So ma orasi imasidiado o nyawa isosone iohokali done naguuna womasipe'deka? Salanta yatumudingi magena yangodu ma kawika!" **24** Kagenade o Yesu wosango wotemo, "Igogou ngini ka nisosomoa! Komagena lo ngini niasahewa o Gikimoi awi demo o buku ma rabaka de awi kuasa. **25** Sababu o nyawa isosoneka la iohokali, ona magena ikawikawa de asa imatero maro o malaikat o soroga ma rabaka gena ikakawiwa. **26** De lo ma ngale o nyawa isosoneka yasiohokali, ce nagaia magena ngini niawosaka, o kia ngini niabaca de nimadotoka o Musa awi buku ma rabaka? Ena gena o jarita ma ngale o ngangaru de o uku ma sora duma o ngangaru magena 'daukuwa. Ma orasi magegena o Gikimoi wotemo o Musaka, 'Ngohi manena 'dabolo o Abraham awi Gikimoi, o Ishak awi Gikimoi de o Yakub awi Gikimoi.' **27** So bilasu o demo magena niasahe o Gikimoi una magena o nyawa iooho manga Gikimoi. So nakoso nitemo o nyawa isosone manga Gikimoi, ngini magena o nyawa ka nisosomoa!"

## O guru agama moi de o bobita ilalamo

**28** Kagen a de o guru agama moi wosigigise o Yesu s de o Sadukika ma nyawa imatekebobicara de imatekekokasango. Ma guru agama magena wanano o Sadukika manga bicara 'dangodu o Yesu s wasango 'daloha icarawa, so una wahino la o Yesu s wisano, "O bobita kiaka foloi ilamo de o bobita 'dangodu manena?" **29** De o Yesu s wosango wotemo, "O bobita ma nonomaka, ena gena, 'He, o Israel ma nyawa tanu niise! O Gikimoi to ngone nanga Jou, una magena ka o Gikimoi womatetengoka. **30**

Nowidodara ani Gikimoi de ani sininga igogou de ani kanako de ani buturu 'dangodu imakomote.' **31** De o bobita ma sinotoka ena gena, 'Nadodara o nyawa ma somoa maro ka to ngona ani rohe masirete.' O bobita ma somoa asa ihiwa de foloisi ilamo de o bobita ngai sinoto magena." **32** Kagen a de ma guru agama magena wotemo o Yesuska, "Igogou de itero, Baba Guru! Sababu o kia ngona notetemo o Gikimoi una magena ka womatengo so o giki ma somoa gena ihiwa. **33** De lo o nyawa bilasu o Gikimoi widodara de manga sininga igogou de manga kanako igogou de manga buturu igogou de una lo wadodara o nyawa ma somoa maro ka to una awi rohe masirete. Magena foloi 'daloha de o gaso yatutupu eko o bi gaso ma somoa isimeta o Gikimoika." **34** O Yesu s iwitailako ma guru agama magena awi sango 'daloha icarawa, so wotemo unaka, "Ngona manena lo he nadumu o Gikimoi awi paretaka!" So 'dabolo de o nyawa moi lo yobaranikawa o Yesuska wisano.

## O Salamati ma Kolano ena gena ma Kolano Daud awi Jou

**35** Ma orasi o Yesu s wodoto o Gikimoi awi Tahu ma lolohaka de o Yesu s womasano, "Dadoohaso o bi guru agama magena aku itemo o Salamati ma Kolano una magena awi sihino o Daud awi ahelino? **36** De salanta o Daud masirete lo de o Gurumi 'Datetebi ma kuasa sidago wotemo; 'O Gikimoi wotemo ai Jouka: Nomatamiye to ngohi ai girinaka sidago ani sature taaka la yahino inisuba ngonaka.' **37** So nakoso o Daud wotemo igogou o Salamati ma Kolano ena gena 'o Jou', done imaaka idodooha so

ona itemo, una awi aheli ma sihino o Daudno?"

### O sitiari ma ngale o bi guru agama

O nyawa yadala kagen a de ona magena yodupa yoise o Yesus wodoto. **38** So una wotemo onaka, "Nimasisitiari de o bi guru agama magena. Ona yodupa manga juba ikukuruku imasitibaka de itagi yakahika o nyawa imatolomuka la o nyawa yahoromati. **39** Ona magena yodupa imatami ma simaka o puji ma tahuka de lo o rarama ma rabaka la o nyawa yakelelo bai. **40** Ona magena o ngope'deka ibabalo yasihaga, de o damato yasiosi so ma duuru de manga tahu lo yakooraka. Ma ngale manga dosa de manga dorou yodidu, so ona isumbayang de ma demo yakuru-kuru la o nyawa yasigiliri. Igogou totemo nginika! Done ona magena o Gikimoi wafanggali 'datubuso icarawa.

### Mobabalo moi ami suba

**41** Ma orasi magena o Yesus o Gikimoi awi Tahu ma rabaka womatamiye so o suba ma borua worisimaka, de watailako o bi nyawa moi nyawa moi manga suba yongado ma boruaku. O nyawa ikakaya yadala manga suba ilamo yongado o boruaku; **42** kagen a o ngope'deka mobabalo moi de mosususa lo mahino. Muna lo ami suba matota, kodo cawali o pipi isesengi o gobang sinoto de ma ragani lo ka ma cunu. **43** Kagen a de o Yesus awi muri-muri watolomu de wotemo onaka, "Niakelelo. Igogou mobabalo mosususa magena mongado foloi ilamo, nako positetero de o nyawa ikakaya yangodu manga suba ma boruaku yongangado gena. **44** Sababu ona magena yahike ma sihino gena manga arata eko manga pipi yadodiahi ma boloino. Duma mobabalo muna magena ami arata ihiwa so cawali kamagen a lo mahikeka."

### O Yesus awi demo ma ngale o Gikimoi awi Tahu

**13:1** Ma orasi o Yesus o Gikimoi awi Tahu ilaiamo wodongosa de awi muri moi manga sidongirabano wotemo, "Baba Guru, hika nanano o bi

tahu-tahu manena. De natailako nosidodiahi o bi teto magegena. Pei! 'Daloha icarawa!" **2** O Yesus wosango wotemo, "Iteroka, ngona nanano gena o tahu magena ilamo de 'daloha. Duma done o tahu-tahu magena ma teto o ngai moi lo asa imalapangawa de o teto ma somoa, sababu 'dangodu magena asa iruba de ituraba.

## O sangisara ma bodito

**3** Kagen a de o Yesus wotagi o Zaitun ma talaka so ma 'dokuka wogogeku de o Gikimoi awi Tahu magena worisimaka. De o Petrus, o Yakobus, o Yohanes de o Andreas yahino ma ngale imasano sababu ka womatengoka. **4** Ona wisano o Yesuska itemo, "Baba, hika nomisingangasu muruoka de asa o hali notetemo magena idadi? De lo nomisidumu ma nonako o kia nakoso ma orasi imasidiado." **5** O Yesus wosango wotemo, "Nimasitiari 'daloha, upa sidago o nyawa nisihaga. **6** Sababu o nyawa yadadala asa yahino de ai demo yaaho so itemo, 'Ngohi manena una magena 'dabolo!' so o nyawa yadadala asa yasihaga so yasisa. **7** So nakoso niise o dupuru ma ili de o kudoti ma habari upa lo nia rohe 'datora. O moi-moi magena bilasu idadi, duma upa nitemo magena o dunia ma dodogu ma orasi imasidiadoka. **8** O bangsa moi yasaturu o bangsa ma somoa, o negara moi asa yakudoti o negara ma somoa. Kiaka o dunia ma 'dokuka asa idadi o osu de o diwotu de lo o bare so o nyawa asa o sapi isisone. 'Dangodu magena asa ka o hi sangisara ma nonomaka bato, koloko o ngope'deka moi mitotilibu de ami siri ma nonomaka so matamaha ma orasi muna he mopuo. **9** "Duma ngini bilasu nimasitiari ifoloi, sababu ngini done nitago de ningaho o bi agama ma bobita yacocohoka. De ngini asa ningapo o puji ma tahu ma rabaka. De lo ngini asa ningaho o bobaretaka eko o kolanoka ma sababu ngini to ngohi ai muri-muri. So magena to ngini nia orasi 'daloloha moi la niasitobio onaka ma ngale ngohi de o habari 'daloloha. **10** Duma o dunia ma dodogu yaado waasi de o habari 'daloloha o Gikimoino gena bilasu isihakawarokasi sidago o dunia ma pupuku ihaka. **11** So nakoso ngini nitago la ningaho o bobaretaka upa lo nimodo ma ngale o kia bilasu ngini nisango. Nakoso ma orasi yaadoka ngini nibicara bato maro o

kanako inihihike o Gurumi Datetebino. **12** O bi nyawa manga gianongoru asa yasidoa o nyawa ma somoaka la yatooma. Komagena idadi de imaaka o baba de o ngopa. De lo o bi ngopa asa yadupakawa manga baba de manga awa so yasidoa o nyawa ma somoaka la yatooma. **13** Ngini manena o nyawa yangodu niduhudu sababu ngini to ngohi ai muri-muri. Duma nagoona isatia sidago o dunia ma dodogu imasidiado ona magena asa isalamati.

## O dorou asa yasiwaroka

**14** "Ma orasika asa niakelelo o dorou ilalamo iwosa isituraba o Gikimoi awi Tahu de o Gikimoi wodupawa so o tahu magena asa wodongosa." (Nako niabaca de niatailako nisidodiahi o demo manena ma ngale.) "Ma orasi magena de o nyawa o Yudea ma dokuka bilasu ilo'da o talaye. **15** So o bi nyawa kanaga manga tahu ma 'dokuka lo imatadahewa youti de yowosa la manga kia naga moi ya'dehe, duma ka iuti de yodolo'da; **16** de o bi nyawa kanaga manga doroka lo imatadahewa iliho la manga baju yadehe, duma ka yodoloda. **17** Duma foloi yasibodito o bi ngope'deka yatotilibuka de o bi ngopa ka isusususi ma awaka! **18** Hika niania o Gikimoika la o moi-moi magena upa idadi o alo eko o muura ma orasika so isusa ngini nilo'da. **19** Sababu ma orasi magena asa idadi de imaaka o sangisara pakokelelo waasi, ka ma solano o Gikimoi o dunia wosidadi sidago kangano manena; de asa idadi-dadikawa. **20** Duma o Gikimoi ma orasi magena watimisi, nakoso ma orasi watimisiwa nagala o nyawa moi lo iohowa. Duma ma ngale o Gikimoi awi gogobu wahihiri sidago o sangisara ma orasi magena watimisi. **21** "O orasi magegena nako o bi nyawa itemo nginika, 'Niakelelo, o Salamati ma Kolano kagena naga!' de ma somoa itemo 'Hiwa, kadoke naga!', upa lo niangaku o nyawa ona magena. **22** Sababu o bi Salamati ma Kolano ikokulai de o bi nabi ikokulai asa yahino de yaaka o nonako ihahairani la yakulai o Gikimoi awi gogobu wohihiri. **23** So bilasu nimasitiari 'daloha! Sababu o moi-moi 'dangodu manena ngohi tinisingangasu i'domaka la ngini nianakoka ngaroko idadi waasi.

## O Nyawa ma Duhutu wahinokali

**24** "Ma nabi Yesaya walefo komanena; 'La o susa de o sangisara magena ipasaka, de o wange de o ngoosa isiwakawa so 'dapuputuka. **25** So o dipa lo ihiti so o moi-moi 'dangodu o dipaka ma dodagi he yamotekawa, de o bi ngoma lo asa o dipaku itura.' **26** Ma orasi magena de asa nikelelo ngohi, o Nyawa ma Duhutu, tahino touti o lobi-lobi ma rabaku de to ngohi ai mulia tomasisaoka de lo ai kuasa ma buturu. **27** To ngohi ai malaikat tasulo la itagi yatolomu to ngohi ai gogobu yangodu o Gikimoi wahihirika o dunia ma pupuku ihaka, sidago o dunia de o dipa ma batika.

## O simodoto o ara ma hutuka

**28** "Ngini bilasu o simodoto o ara ma hutuka nimagese. Nakoso o ara ma hutu ma umaka la niakelelo itoori de lo iboboko, magena inasinonako o ogo ilalamo idumuka. **29** Komagena lo nakoso o susa de o sangisara 'dangodu ngohi tododedemoka la idadi, gena nianako ai hino ma orasi he idumuka. **30** So nianako igogou, o bi sangisara ma hali moi-moi manena done asa idadi de imaaka nakoso o nyawa iooho manena upasi isone yangodu. **31** So o dipa de o tona asa 'dasisa de 'dalutu duma ai demo de ai dodoto asa itagi gila-gila de ma dodogu ihiwa.

## O nyawa moi lo yanakowa ma orasi eko ma wange

**32** "Ngaroko komagena o nyawa moi lo asa yanakowa to ngohi, o Nyawa ma Duhutu, ai hino ma orasi eko ma wange. Salanta o malaikat o sorogaka lo yanakowa de ngohi awi ngopa masirete lo tanakowa ka cawali ai Baba masirete wanakoka. **33** So ngini bilasu de nia dailakoka de nia sitiarika sababu ngini nisidodoguwa ai hino ma orasi eko ma wange. **34** Magena posiade imatero maro o nyawa moi awi tahu wodongosa de wotagi o doku ma soa ikukuruka. Una magena awi jojaga wasulo awi tahu yojajaga so moi-moi de to ona manga manara awi tahu ma rabaka. O tahu ma ngora wojajagaka wobeseso wotemo, 'Nojaga nosidodiahi.' **35** So bilasu nimajaga sababu ngini nianakowa muruoka de o tahu ma duhutu

magena wakahinokali awi tahuno so nagala 'dama'da-ma'da, nagala o putu itongiraba, nagala he 'danginita eko nagala o goginitano. **36** La upa sidago ngohi tahino tinisitodokano de tinisitodadaheno ngini o gogiolo ma rabaka. **37** So o kia bato ngohi asa tinidodedemo nginika, magena lo todedemo o nyawa yangoduka: La bilasu imajaga imasidodiahi!"

## Manga sininga ma dorou o Yesuska

**14:1** Midirika de o Paskah ma Wange ma Rarame imasidiado, komagenalo o Roti ma Ragi Ihihiwa ma Rarame gena isitodaaka. O imamka ma bi sahe de o bi guru agama manga edekati ma ngeko gena isipongoka, ma ngale o Yesus witago de witooma. **2** Duma ona magena itemo, "Upa lo paaka ma orasi o rarame ma rabaka, sababu done o gangamo posigoko."

## O Yesus de o gososo 'dabobou

**3** Ma orasi o Yesus woo'do o Betania ma dokuka, kagenalo o Simon i'do'doma una wipapado awi tahuka, de o ngope'deka moi mahino o gososo 'dabobou de ihahali o rube moi maaho; o gososo magena yaaka o bi ngutu 'dabobouno. Gila-gila o rube ma tolo magena mapolote so o gososo magena mosi'dahu o Yesus awi saheku. **4** O nyawa yamuruo naga kagenadahu yatoosa so itemo moi de moika, "Ce! O gososo 'dabobou magena 'dapoosa!" **5** O nyawa ona magena mingamo, "Kiaso nofuma komagenalo!" De itemokali moi de moika, "Magenalo o gososo ihahali nakoso la posiiija gena ma ija o juta muruo, imatero de o nyawa manga gaji o taungu moi la ma pipi de o nyawa isususaka pahike." **6** Duma o Yesus wotemo, "Dadoohaso ngini nimingamo de ami sininga niasiri? Boloka! Sababu muna maakaka o manara 'daloloha-loha moi de yogogiliri ma ngale ngohika. **7** O bi nyawa isususa kanaga igoge to ngini nia sidongirabaka, so o wange isigeto-geto nako niadupa de maena, ngini aku niariwo o nyawa isususa ona magena. Duma itekakawa de ngohi kanena asa ihiwaka. **8** O manara ilalamo moi o ngope'deka muna magena aku maakaka, o gososo 'dabobou mosi'dahuka ai roheku gena mosidailako



'daboloka ma meta ngohi bilasu ipoosuka ngaroko ma orasi waasi. **9** Igogou! So o ngope'deka ami manara 'daloloha de yogogiliri manena done asa ka yapetoka maro o sosininga moi munaka kekiaka bato o Gikimoi awi habari 'daloloha asa isihabari o dunia manena ma rabaka."

## O Yudas wosiaota o Yesus wisiiija

**10** La o Yudas Iskariot o muri moi o Yesus awi muri yamogiowo de sinoto manga dongirabano, awi edekati 'datorou. So wotagi o imam ma bi saheka la wasibicara ma ngale o Yesus iwisiiija. **11** So ona magena manga sininga imore de 'danali de witolabutu de wisijaji asa o pipi wihike o Yudaska. So de kagen a de o Yudas wosolano o ngeko wosisari la o Yesus wisiiija.

## O Yesus de awi muri-muri o Paskah ma ino yao'do

**12** O wange ma nonomaka o Roti ma Ragi Ihihiwa ma Rarameka, orasi magena o Paskah ma duba-duba ma goho yatola. O Yesus awi muri-muri yosano unaka, "Baba, kiaka ngomi misidailako to ngone nanga Paskah ma ino?" **13** So o Yesus wosulo o muri yasinotoka, "Nitagi kadoka o dokuka done o nyawa yanau moi niwimake o rube de ma akeka waaho. Una magena niwimote, **14** o tahu kiaka wowosa de nitemo o tahu ma duhutu magenaka, 'Baba Guru wosano, o ngihi kiaka una de awi muri-muri asa io'do o Paskah ma ino?' **15** So o nyawa una magena asa wasidumu kadaku ma 'dokuka o ngihi moi ilalamo. O ngihi magena isidiahi de isidailako 'daboloka, ma meja de ma dodego lo isifatoka. Kagen a o ino nisidailako ma ngale ngone inangodu." **16** Kagen a de o Yesus awi muri yasinoto yotagi o dokuka de kadoka ona yamake maro o kia o Yesus wotetemo. So ona asa isidailako o Paskah ma ino magena. **17** La 'daputuku o Yesus de awi muri yamogiowo de sinoto yahino. **18** So o tahu magenaka ona imatamiye io'do de o Yesus wotemo onaka, "Niisesi! O orasi manena o nyawa moi to ngini nia sidongirabano ai dateka de woo'do dede ngohi done asa ngohi woisiiija." **19** O demo magena yoise so o Yesus awi

muri-muri manga sininga 'dasiri so itemo moi de moika de imasano o Yesuska, "Baba, ngaroko lo ngohiwa o kia notetemo gena!" **20** So kagena de o Yesus wosango, "Una magenena nimogiowo de sinoto nia sidongirabano kiaka una awi ino o lelengaku asa wongangado dede ngohi. **21** Igogou, ngohi o Nyawa ma Duhutu manena asa tosone maro o kia isilelefo o buku ma rabaka. Duma, naguuna woisiiija ngohi o Nyawa ma Duhutu manena, kodo, o nyawa una magena awi bodito 'datubuso! Lebelaha o nyawa una magena upa lo wisibuo!"

### O Jou awi o'do 'datetebi

**22** De ma orasi ona imatamiye yoo'do o Yesus o roti wa'dehe so awi sukuru watide o Gikimoie. 'Dabolo de o roti magena watepi-tepi de to una awi gia, de gila-gila awi muri-murika wasitoku de wotemo, "Nia'dehe de niao'do manena to ngohi ai rohe." **23** Magena 'dabolo de una o anggur ma udo-udo wa'dehe de awi sukuru idola o Gikimoie. De o udo-udo magena wahike awi muri-murika, de ona magena moi-moi o anggur magena yaudo. **24** Yaudo 'dabolo de o Yesus wotemo, "Manena to ngohi ai au, inasinako igogou o Gikimoi awi jaji la o au ikokopola manena ma meta o nyawa yadadalaka ma ngale o dosa ma apongu. **25** Tinisingangasu, ngohi done o anggur manena taudokawa duma ma orasi imasidiadokali done asa ngohi taudo o anggur 'damomuane o Gikimoi awi pareta ma rabaka." **26** 'Dabolo de ona yangodu yonyanyi wigiliri o Gikimoika so 'dabolo de ona isupu de itagi o Zaitun ma talaka.

### O Yesus wosingangasu o Petrus asa womanosu

**27** Kagena yahika de o Yesus wotemo awi muri-murika, "Ngini ningodu manena done nilo'da so nidongosaka, sababu kanaga o buku ma rabaka asa isilefoka, 'O Gikimoi asa ma sowohi witooma so ma duba ilo'da imakokitingaka.' **28** Duma ngohi asa toohokali isosone manga sidongirabano, so ngohi totagi to'doma o Galileaka." **29** De o Petrus wotemo, "Hiwa Baba! Ngaroko ai dodiao ona nidolo'daka Baba, duma ma

bati tosone ngohi tonidongosawa, Baba." **30** So kagena de o Yesus wotemo o Petruska, "Nososininga. O putu manena o toko isore asa ma sinoto ngona nomanosu he ma para ma saange de notemo ngohi noinakowa." **31** O Petrus wosango de wotemo wosigogou, "Hiwa Baba! Ngaroko ngohi tosone dede ngona duma ngohi tomanosuwa." De awi muri-muri ma binuka lo itemo komagena.

## O Yesus womania o Getsemanika de witago

**32** Ona imasidiado o doro moika ma ronga Getsemani, de o Yesus wotemo awi muri-murika, "Kanena nigogeku la totagi tomania." **33** De o Yesus wasigaro o Petrus, o Yakobus, de o Yohanes so ona itagi dede una, de wamalo awi raba itonga. **34** Kagena de o Yesus wotemo onaka, "Ai sininga ma sangisara 'datubuso, tamalo gena maro he tosone. Ngini kanena nigogoge la nimajaga." **35** La o Yesus womatinga sutu ikuruka de o tonaku wobukuku de womania. Awi gogolo ma rabaka nako yaaku de upa o sone ma ngeko manena widahe. **36** De wotemo, "Ya Baba, 'dangodu aku naaka de idadi, so tanu natide de noisitulaku o sone ma ngeko manena. Duma upa namote to ngohi ai sininga ma dupa manena, la tanu idadi de imaaka ka to ngona ani sininga ma dupa." **37** 'Dabolo de o Yesus wokahino de wamake ona yaruwange yakioloka. De una wotemo, "Petrus, o kiaso nikioloka, orasi moi bato de nomajaga naakuwa?" **38** De o Yesus wotemo onaka, "Nimajaga de nimanika la upa o babajaku nitura. Ngaroko nia siningaka ma mode igogou, duma nia rohe 'damomo'doka." **39** O Yesus wotagikali de womania de awi demo imatero de ma nonoma. **40** 'Dabolo de una wokahino awi muri-murino de wamake ona yakiolokali sababu ona ikakadu poli. So ona isimakewa itemo o kia o Yesuska. **41** So kagena de o Yesus wakahinokali ma para ma saangeka de wotemo onaka, "He! So ngini nimasiwomasi de nikiolosi? Boloka! Ma orasi imasidiadoka. Ngohi o Nyawa ma Duhutu manena isidoa o nyawa ibabaradosa manga gia ma sohaka. **42** Nimomi, hino la potagi. Niakelelo, o nyawa ngohi woisiiija una womasidiadoka." **43** Ma orasi o Yesus wobobicarasi de o Yudas, awi muri yamogiowo de sinoto manga sidongirabano,

womasidiado. Una magena wahino de o nyawa yadadala manga giaka o sumarangi de o gogipongo ilalamo. Ona magena o imamka ma bi sahe de o bi guru agama de lo o Yahudika ma roriri gena manga nyawa yasusulo. **44** Ma nonomasi o Yudas gena o nonako moi wahikeka wotemo komanena: "O nyawa naguuna ngohi towihahame gena una magena 'dabolo, Niwitago una de niwingaho, de lo niwijaga nisidodiahi, upa lo niwipalako." **45** Ma orasi o Yudas womasidiado gila-gila o Yesuska wotagi de wotemo, "Baba Guru." De gila-gila wikololo de wihame. **46** So kagenade o nyawa yadadala de o Yudas imakokangaho magena o Yesus iwitago de wipiliku. **47** Duma o nyawa moi kagenade manga sidongirabano awi sumarangi walia de wisioto ma Imam Wilalamo awi gilaloka so awi ngau lo waturaka. **48** De o Yesus wotemo onaka, "'Dadoohaso ngini nitemo ngohi o nyawa ma dorou, sidago niahino o gogipongo de o sumarangi nigaho la ngohi nitago? **49** O wange isigeto-geto ngohi todoto o Gikimoi awi Tahuka de to ngini nia simaka, de 'dadoohaso ngohi nitagowa? Duma igogou bilasu komagenade sidago idadi de imaaka maro o kia isilelefo o buku ma rabaka." **50** Kagenade awi muri-muri yamodo so yolo'da de o Yesus widongosaka. **51** Cawali o gohiduuru moi o baro womasikolorono de wotagi o Yesus iwimote. So o nyawa yadadala yahika witago, **52** duma to una awi baro waumo de wolo'da ka womawatoka.

## [O Yesus o Mahkamah Agama manga simaka](#)

**53** O Yesus iwingaho ma Imam Wilalamoka. Kagenade o imamka ma bi sahe de o Yahudika manga roriri de lo o bi guru agama yangodu imatolomu. **54** O Petrus manga duduno wototuuu o Yesus iwimote sidago wowosa ma Imam Wilalamo awi tahu ma lolohaka. Kadoke una wogogeku de wialo so womarahu womasicapuka de o bi jojaga. **55** O imamka ma bi sahe de o Mahkamah Agama yangodu o Yesus iwisitailako de wisisari ma ngeko la wisisala sidago una bilasu wisosone. Duma o sala moi lo yamakewa. **56** O saksi yadala yahino yodedemo to ona manga gulai de manga damato so moi-moi manga bicara imaketerowa. **57** De o saksi yamuruo naga imaoko de isibicara to ona manga damato ma ngale o

Yesuska, **58** yotemo komanena: "Ngomi miiseka o nyawa una magena wotemo, 'Ngohi done o Gikimoi awi Tahu manena de o nyawa manga gia isiaaka asa taruba de tabiau. De o wange saangeka ngohi asa taokokali 'damomuane duma o nyawa manga gia isiaakawa.'" **59** Duma o nyawa isasaksi magena manga demo moi-moi imaketerowa. **60** So ma Imam Wilalamo manga simaka womaokoye de o Yesuska wisano, "To ona manga demo de manga sosano ma dala komagena ngonaka, 'dadoohaso nasangowa?" **61** Duma o Yesus womarihika bato, 'dangodu una wabisangowa. La ma Imam Wilalamo wisanokali unaka, "Igogou ngona o Salamati ma Kolano de o Gikimoi Wikukuruye ma Ngopa?" **62** Kagen a de o Yesus wosango wotemo, "Ngohi manena una. De ngini asa nikelelo ngohi o Nyawa ma Duhutu tomatamiye o Gikimoi awi pareta ma girinaka de asa nikelelo tokahino o sorogano." **63-64** So ma Imam Wilalamo awi juba waraca de wotemo, "Ngini ningodu niise masirete, awi demo-demo 'dangodu o Gikimoi wisikudahu! Upa he o saksi posarikali. Orasi manena o kia niodupa ngone paaka unaka?" De yangodu itemo, "O Yesus de wisala!" De imatoore, "Bilasu una wisosone!" **65** Gila-gila o nyawa yamuruo naga o Yesus wihobi, de awi lako yapoku de wingapo de yotemo, "Hika, nakoso ngona o nabi moi, naguuna woningapo!" De o bi jojaga imasimote o Yesus wipopoka.

## O Petrus womanosu

**66** Ma orasi o Petrus ka o lolohakasi de o ngope'deka moleleleani ma Imam Wilalamoka mahino kagen a. **67** De mowikelelo o Petrus o uku ma dateka womarahu. Muna mowikelelo de mowisibilatu awi jamani de motemo, "He! Ngona manena lo o Yesus o Nasaret ma nyawa nowimomote." **68** Duma o Petrus womanosu de wotemo moleleleanika gena, "Ngohi tanakowa de tasahe wa o kia ngona notetemo gena!" Gila-gila o Petrus wotagi o pagari ma ngora ilalamo ma dateka, de o orasi magena 'dabolo o toko isore. **69** Kagen a de muna o Petrus mowikelelo de mosingangasu o bi nyawa kagenadahu, motemoli, "Cedeke! O nyawa una magena lo to ona manga sidongirabano." **70** Duma o Petrus

womanosukali. Itekawa de o orasi magena o bi nyawa kagena itemo o Petruska, "We! Ngona upa nomanosu! Igogou ngona manena to ona manga dodiao moi, sababu ngona o Galilea ma nyawa." **71** Kagena de o Petrus gila-gila wosasi de womasilahi, "Ngaroko tosone duma igogou ngohi towinakowa o nyawa una magena maro o kia ngini nitetemo gena!" **72** O orasi magena 'dabolo o toko isorekali ma para ma sinotoka. De o Petrus womasininga igogou ma nonomasi o Yesus asa wisitemo unaka, "O toko isore ma sinoto waasi de ngona he nomanosu nosipara ma saangeka." La o Petrus womagalusiri so woari wosodu-sodu.

### O Yesus o Pilatus awi simaka

**15:1** Ma orasi o goginitanosi ona o Mahkamah Agama yangodu de o imamka ma bi sahe de o Yahudika manga roriri de lo o bi guru agama imatolomu de jai-jai imatekefakati. So o Yesus wipopilikuka de gila-gila wingaho de witota ma Gubernur Pilatuska. **2** So kagena de o Pilatus wisano o Yesuska, "Igogou ngona o Yahudika ma nyawa manga kolano?" De o Yesus wotemo, "Iteroka maro o kia notetemoka." **3** O imamka ma bi sahe manga galaki idala ma ngale o Yesus. **4** So o Pilatus wisanokali o Yesuska, "Dadoohaso nosango noholu? Hika nakelelo o galaki ma dala magena inisitemo ngonaka." **5** Duma o Yesus ka o demo moi lo wosangowa sidago o Pilatus ka wohairani.

### O Pilatus o Yesus wisidoa la wisosone

**6** O Paskah ma Rarame imasidiado so o Pilatus bilasu o nyawa moi o bui ma rabano wisisupu de wipalako yamota to ona manga ngongiri. **7** Kagena o bui ma rabaka yasingosaka ma orasi ona icanga 'dabolo o Roma ma bobaretaka ena gena o nyawa itotooma yamuruo naga, kanaga manga sidongirabano wimoi awi ronga o Barabas. **8** O nyawa yadadala imatolomuno de imagolo o Pilatuska wamote awi biasa ma ngale o nyawa moi wipalako o bui ma tahuno. **9** Kagena de o Pilatus wasisano onaka, "Ngini nimode ngohi towipalako o Yahudika manga kolano la tinihike

nginika?" **10** Sababu Pilatus wosihoda o imamka ma bi sahe iwitota o Yesus, ma ngale manga sininga ma siri o Yesuska. **11** Duma o imamka ma bi sahe o nyawa yadadala yafakati la igolo o Pilatuska ma ngale o Barabas wipalako de wahike onaka. **12** De o Pilatus wotemo o nyawa yadadalaka magena, "Ngini niodupa ngohi o kia taaka kiaka ngini nitetemo una manena o Yahudika manga kolano?" **13** De ona yangodu imatoore itemo, "Una bilasu iwisidasangahadi!" **14** Duma o Pilatus wotemo onaka, "Awi dorou o kia nginika?" Duma ona ifoloi imatotoore, "Bilasu iwisidasangahadi!" **15** So kagen a de o Pilatus o nyawa yadadala manga sininga wosimote so o Barabas wisisupu de wihike onaka. De una wasulo awi pajuriti-pajuritika ma ngale o Yesus wingangapo de gila-gila una wisidoa onaka la iwisidasangahadi.

### O bi pajuriti o Yesus wisima'de

**16** O bi pajuriti o Yesus wingaho ma Gubernur awi mahkamah ma riho o kadato ma rabaka de awi baru-baru 'dangodu yatolomu. **17** Kagen a de ona o juba 'dauungu maro o bi kolanoka manga juba wisitiba de o bi gota ma daara 'datototopo yaaka koloko to una awi makota moi so awi saheku isitalake. **18** 'Dabolo de ona itemo unaka, "Suba, Jou! O Yahudika manga kolano!" **19** De gila-gila o Yesus awi saheko o lou isingangapo de lo awi bioko yahohobi. Bioko yahobi 'dabolo de yobukuku isuba unaka. **20** So wisimama'de 'dabolo de o Yesus awi juba 'dauungu yahoi de wisitibakali to una awi juba masirete. De asa wituda wisisupu so itagi la iwisidasangahadi.

### O Yesus wisidasangahadi

**21** Kagen a de ona itagi so yahika o ngeko ma soaka de o nyawa moi wimake de wigegego o Yesus awi sangahadi wamoku. O nyawa una magena asa o soano wokahino de wokahika o kotaka. Awi ronga o Simon awi sihino o Kirene ma nyawa o Aleksander de o Rufus manga babano. **22** O Yesus wingaho o riho moi ma ronga o Golgota, ma ngale "O Sahe ma

Papala ma Riho". **23** So kagena yahika de ona wihike unaka o anggur de o dalu ma pupuda isicapuka so wisisou la awi siri isikurangi, duma o Yesus waudo waholu. **24** So kagena de gila-gila ona wisidasangahadi de awi pakaiian imatekesikotoku yaaka moi-moi manga gimina yamote o undi ma rabaka. **25** Ma orasi wisidasangahadi gena o goginitano o cako siwo. **26** Awi sangahadi ma 'dokuka yalefo o galaki ma demo itemo: "Una manena o Yahudika manga kolano". **27** O orasi magena o Yesus de itotooma yasinoto yasisangahadi ka o wange moi, so moi o Yesus awi girinaka de moi awi gubalika. **28** La komagena imaaka so itero de itiaika maro o kia isilelefo o buku ma rabaka, ena gena: "Una wisitero koloko o bi nyawa ma dorou". **29** O bi nyawa nogena yakokahino la wikelelo de ona manga sahe yagiwi de wisima'de itemo, "Cedekele! Temo ngona gena o Gikimoi awi Tahu aku naruba de nabiau, duma o wange saangeka de naokokali. **30** Nako igogou de hika o sangahadiku nouti la ani rohe isalamati." **31** Komagena lo o imamka ma bi sahe de o bi guru agama o Yesus wisima'de de itemo moi de moika, "Cedeke! O nyawa ma somoa wasisalamati de una awi rohe masirete de wosisalamati waakuwa. **32** Nakoso igogou una o Israel ma Kolano de lo o Salamati ma Kolano, 'daloha ilaku de o orasi manena una o sangahadiku wouti la ngomi miwingaku de miwipiricaya cawali ka una!" De o nyawa yasinoto yasisangahadi ona lo imasimote o Yesus wisima'de.

## O Yesus wosone

**33** La o wange itotiai de o Palastina ma daera ma sigilolino magegena 'dapuputu ma deka o orasi saange. **34** Sidago o cako saangeka de o Yesus womatoore, awi ili wapoputuru, "Eloi, Eloi, lama sabakhtani?" ma ngale gena, "Ai Gikimoi, ai Gikimoi, 'dadoohaso ngona noidongosa ngohi?" **35** O bi nyawa ngo kagena yogiise o gore magena de itemo, "Niisesi, una o Elia wiaso!" **36** O nyawa moi to ona manga sidongirabano womatai-tai so o bunga moi koloko o kaka wa'dehe so watono o anggur 'dakokiopiku. 'Dabolo de o bunga magena o gota ma ideka wosisuruka de watubo la ma ngale o Yesus wapipi, de wotemo, "Mahasi! La hika ngone pakelelo



nakoso o Elia wahino de wisiguti o sangahadiku!" **37** Ma dodoguka o Yesus womatoore de wosoneka. **38** Ato imatodoka o ngora ma guba o Gikimoi awi Tahuka iraca de ileta sinotoka kadaku ma bati kudahu. **39** Ma kapita moi womaokoye o sangahadi woririsima gena wakelelo idodooha o Yesus awi sone ma ngeko de ma kapita magena wotemo, "Igogou, o nyawa una manena o Gikimoi ma Ngopa!" **40** Kagenadahu lo ongo Salome, ongo Maria Magdalena, de lo ongo Maria o Yakobus o gohiduuru magena de o Yoses manga awa ona de o bi ngope'deka yamuruo nagaii yakelelo o hali idadadi magena ma soa sutu ikuruka. **41** Ma orasi o Yesus o Galilea ma dokuka de o bi ngope'deka ona manena o Yesus wimomote de wiriwoka. De kanagasi o ngope'deka ma somoa o Yerusalemno yahihino imakangaho de o Yesus.

## O Yesus wipoosu

**42-43** Orasi magena o sidailako ma wange de he 'dama'da-ma'da o Yusuf o Arimateano wahino. O Sabat ma wange idumuka so ma ngale magegena o Yusuf womabarani wahika o Pilatuska de wagolo o Yesus awi bake. O Yusuf una magena o Mahkamah Agama moi wihohoromati, una lo wododamaha o Gikimoi awi orasi wopareta. **44** O Pilatus wogiise o Yesus wosoneka de una wohairani so una o nyawa wasulo itagi ma kapita wiaso la wisano, "Igogou o Yesus awi woma itola itekaka?" **45** La ma kapita wodedemo o Pilatuska, "Igogou", de o Pilatus o Yusuf wisimaha o Yesus awi bake magena waaho. **46** So kagen de o Yusuf o baro 'daaare wojja so o Yesus awi bake magena wisiguti o sangahadiku la isisangi de o baro 'daaare magena. 'Dabolo de o bake magena wapoosu kiaka o boosu magena yaaaka o teto ma rabaka. 'Dabolo de una o teto ilalamo moi walolo o boosu ma ngora magena wosiperesu. **47** Orasi magena lo ongo Maria Magdalena de ongo Maria o Yoses ma awa ona lo yananano o riho kiaka o Yesus wipoosu.

## O Yesus womomika woohokali

**16:1** Ma orasi o Sabat ma wange ipasaka de ongo Maria Magdalena, ongo Maria o Yakobus ma awa de ongo Salome itagi o bi rapa iija ma ngale o Yesus awi bake isimuja. **2** O Nahadi ma wangeka o goginitanosi o wange asa ibao ona itagi o boosuka. **3** Yahika o ngeko ma soaka de itemo moi de moika, "O teto o boosu ma boberesu magena nagoona asa inariwo yatinga?" **4** Duma ma orasi kagen a imasidiado o teto ilalamo magena ona yakelelo iloloka. **5** So kagen a de ona gila-gila iwosa o boosu ma aru ma rabaka magena de ona imaginano o girinaka de yakelelo o gohiduuru moi awi juba 'daaare womatamiye, so ona isawangi de yamodo. **6** O gohiduuru magena wotemo, "Upa nimodo! Ngohi tininako ngini niwisari o Yesus o Nasaret ma nyawa kekiaka una wisidodasangahadika gena. Hika nianano masirete kanena awi riho kiaka una wisiidu. Duma kanena wihiwaka. Una woohokali! **7** So orasi manena nitagi o habari manena nisingangasu to una awi muri-murika, komagen a lo o Petruska. Nisingangasu, 'Una wotagi wo'domaka o Galilea ma dokuka, kadoka ngini asa niwikelelo una, maro o kia ma nonoma ngini winisitemoka.'" **8** So kagen a de ona isupu o boosuno gila-gila ilo'da imagogora sababu yamodo poli. Sababu yamodo poli so o nyawa moika lo ona isingangasuwa.

### O Yesus womasimane ongo Maria Magdalenaka

**9** La o Yesus woohokali o nyawa isosone manga sidongirabano o Nahadi ma goginitano de una womasimane ma noma-noma ongo Maria Magdalenaka. Ong o Maria i'do'doma o Yesus asa wodusu to muna manena ami toka ngai tumudingi. **10** So ongo Maria Magdalena motagi mosihabari o Yesus awi dodiaoka mamake ona idodora de iari isodu-sodu. **11** La o orasi magena ona yogiise ongo Maria motemo mowikeleloka o Yesus woohokali, duma ona imingakuwa.

### O Yesus womasimane awi muri yasinotoka

**12** Komagen a 'dabolo de o Yesus womasimanekali awi muri yasinotoka ma ngeko awi jamani watagali. Magena idadi ma orasi o muri yasinoto

magena manga dodagi ma rabaka o Yerusalemno isupu yakahika o doku moika. **13** Kagen de ona iliho gila-gila isihabari o hali magena o bi muri ma somoaka duma ona yongakuwa.

### O Yesus womasimane awi muri-murika

**14** Ma dodoguka o Yesus womasimanekali awi muri yamogiowo de moika ma orasi magena imatamiye yoo'do. Una wasidapano ona magena sababu manga piricaya ka ma cunn de nanga sahe 'datogoi so ona yangakuwa kiaka o nyawa isingangasu o Yesus ona wikelelo masirete una woohokali. **15** So kagen de o Yesus wasulo onaka, "Nitagi ma bati o bi doku o dunia ma ngoguka de nisingangasu o habari 'daloloha o Gikimoino ma meta o dunia ma nyawaka. **16** La o nyawa nagoona yangakuwa o Gimimoi awi habaru 'daloloha done o tampala yamake. Duma o nyawa yongangaku o Gikimoi awi habari 'daloloha de yaoosika done o salamati yamake. **17** La o nyawa yopipiricaya ona magena tahike ai kuasa la o nonako ihahairani aku yaaka; komagen lo de to ngohi ai ronga aku o toka yodusu; de ona lo asa isibicara o bi bahasa ngaroko yanako waasi; **18** de nakoso ona o ngihia yacoho eko o raci yaudu asa ona isiboditowa; de lo nakoso to ona manga gia yasipa'da o nyawa yasisirika o nyawa ona magena asa yalohakali."

### O Yesus o sorogaye witide

**19** So de o Jou Yesus wobicara 'dabolo gila-gila una asa witide o sorogaye, so kadaku womatamiye o Gikimoi awi girinaka la ona yasinoto ipareta. **20** Kagen de awi muri-muri itagi isihabari o Gikimoi awi habari 'daloloha sidago ma bati o bi doku o dunia ma ngoguka. De o Jou lo womote to ona manga manara ma rabaka sidago aku yaaka o nonako ihahairani, la nagoona isigogigise to ona manga dodoto magena asa yanako itero de igogou.